



廣州府志

ル 5
1212
6



門
1212
6



廣州府志卷十三

輿地略五 山川

山川四

廣州府

府境南瀕海自惠州歸善縣西至新安縣又西北至東莞縣西南六十里名三門海中有三洲海潮自東南來至此分為三道因名又西至番禺縣東南又西南至香山縣九十里又西少南至新會縣百里曰厓門海兩山高峙其口如門外達烏猪大洋又西至新甯縣西南二百里為寨門海番舶往來之衝東至下川山南曰大牌海又東至上川山又曰小金門海諸夷入貢遇逆風則從此進又至上川山左曰大金門海迤北為銅鼓海又東北即厓門海廣州南海縣從廣城出古

斗邨南又東南二百里抵東莞縣廣海衛又南六十里出虎頭門又南一百五十里抵南頭城下海可抵甌越西道七十里出上弓灣抵新會縣出城八十里為厓門又南七十里廣海衛扼其要衝出虎頭甲子二門則東西二洋隨舶所之東可以至倭國西可以通西番此海中往來之道也

據大清一統志黃

通志參修

番禺記曰早潮上晚潮下兩水相合謂之沓潮又云濤水者潮取物多者其力盛來遠者其勢大今潮水從東地廣道遠陵山觸岸從直赴曲其勢不泄故湧起成濤據藝文類聚阮通志參修廣州潮以朔日長至初四而消以望日長至十八而消謂之水頭以初四消至十四以十八消至廿九三十謂之水尾春夏水頭盛於晝秋冬盛於夜春夏水頭大秋冬小故防倭者

自清明前三日至大暑前一日謂之春汛春汛為大以水頭故言大汛也自霜降前一日至小寒前一日謂之冬汛冬汛為小以水尾故言小汛也潮朝潮也汐夕潮也統謂之潮與月相應余靖云月臨卯酉則水漲乎西東月臨子午則潮盛乎南北彼竭則此盈者是也然月順天右行積三十日一周天其臨子午卯酉時有先後故潮因之亦有晝夜早暮之不同粵潮分五節朔至初三十六至十八潮夏辰冬午春秋巳汐夏戌冬子春秋亥此之謂平初四至初六十九至二十一潮夏巳冬未春秋午汐夏亥冬丑春秋子此之謂落初七至初九二十二至二十四潮夏寅冬辰春秋卯汐夏申冬戌春秋酉此之謂敗初十至十二二十五至二十七潮皆同上唯春則巳時汐皆同上唯春則亥時此之謂起十三至十五二

十八至三十潮夏卯冬巳春秋辰汐夏酉冬亥春秋戌此之謂旺大抵潮於寅而汐於申兩辰而盈兩辰而縮朔後三日明生而潮壯望後三日魄見而汐湧仲春月落水生而汐微仲秋月明水生而潮壯陰陽消長不失其時故曰潮信若夏秋之際朝潮水落夕汐乘之駕以颶風前後相蹙海水沸溢是曰沓潮此則潮之變也裏海較大海潮遲數刻乃逕迅紆迴之別俗傳初一十五水上日午初九二十三水大牛歸欄實是不爽據郭通志張府志廣東新語粵中見聞參修

北江為瀆武湟三水合流瀆水源出大庾嶺過烏逕至南雄州治西南流一百五十里逕韶州府治東北與武水合漢元鼎五年討南越主爵都尉楊僕為樓船將軍出豫章下橫浦入瀆水即此武水源出湖南郴州宜章縣廣莽山逕桂陽臨

武縣至韶州樂昌縣西又名三瀧水東逕縣治南又八十里逕韶州府治西南與瀆水合湟水源出郴州南黃岑山元鼎五年討南越衛尉路博德為伏波將軍出桂陽下湟水是也湟水南至連州星子司紅巖山下東南流入連州江合眾溪會朱岡水逕州治前過龍泉楞伽羊跳龍頭諸峽至陽山縣界合冠水東南流過連州諸灘又東過青蓮水口逕青蓮司前又逕雷豐鄉出黃家陂三峽東達韶州英德縣界與瀆水合北江之名自此著矣北江西南流一百二十五里逕彈子磯又逕觀音巖又過瀆陽峽又過大廟峽至廣州清遠縣界南逕稔岡又逕清水逕又逕火炭墟又逕白廟又過清遠縣治南又西逕鼇頭塔又南至迴岐司南流一百一十里至三水縣上界牌山西北又西過鴨浦水東至龍坡山之陽又名

蘆包水也蘆包水逕三水縣治北四十里東至鹹魚嘴會肄江之流肄江亦北江水也自鹹魚嘴南流達南海之靈洲官署矣北江過蘆包口西南過南津水又西南過思賢濬西江自肇慶高要縣來會之三水志西江遠縣治前夏月四之一餘月十之一北江東逕五頂都北西經老鴉洲龍船沙者又名蒼江也東南至崑都山東至白塔岡遠三水縣治南者又名肄江也又東過西南潭又東南逕南海金利司靈洲蘆包水東北來合之南達石門之衝花縣橫潭水馬逕水合巴由水北來注之又從化流溪水東北來注之漢元鼎六年冬討南越樓船將軍將精卒先陷尋陬破石門得越船粟即在此也昔呂嘉拒漢積石為門故名曰石門也自石門至沉香浦南流為巨浸又南逕雙女山又東南過荔枝洲又過柳波浦東匯為白鷺潭逕省治

南會珠江入於海北江逕老鴉洲外者東至南海黃鼎司小唐又東逕荔枝園又逕莊步自北江赴省治舊惟取道石門今則多行莊步西南潭淤塞故也又南逕紫洞又東至王借岡今亦漸涸淺矣北江遠王借岡之陽東逕五斗口溶洲堡又東逕魁崗堡又逕深村堡又逕平洲堡又逕季華堡又逕林岳堡北合大王濬東逕龜岡塔東趨省治會珠江入於海魁岡堡瀾石鄉季華堡三山鄉平洲堡平朗鄉隔江南岸毗順德界俱有支津入海北江遠王借岡之陰扶南梯雲大厯西隆四堡水北來合之入沙口東逕佛山鎮東北逕疊濬堡又逕神安司又東逕大通堡又東北出大通港東南入白鷺潭與石門南下巨浸會也五斗口嶗岡堡下三山西淋山之門南與平洲江水合北江由小唐至紫洞西流者西逕龍慶又逕大沙又西南逕大岸南逕江浦司則西樵山之東也又

南逕龍津堡又逕沙頭堡又南逕順德龍江堡會大澎河南

下入於海據黃通志郝通志郭通志大清一統志史記漢書元和郡縣圖志方輿紀要張府志清遠志從化

志花縣志三水志南雄州志韶州府志英德志連山志陽山志順德志參修

謹案阮通志云郭志北江水道自西淋之平洲折而東北二十里曰三山江又折而西南二十三里曰瀾石江殊自相矛盾以今日水道驗之北江由王借岡南流者先至瀾石乃至西淋次至平洲次至三山皆自西之東不知撰述者何以忽自西淋而中分東為三山江西為瀾石江也又云自三分而為鼎安東江江之西為西江又自西江分而為官洲江又西南五里為鹽步江又南二里曰清石江夫西北東三江為粵東百川之冠而於南海邑志之內特箸三江之

名似乏典據至於石門以上不溯其源縣屬所經及入海之區不詳其地魏志因之耽圖經樂泳游者何所考也黃通志僅述大概郝通志略之又略張府志用郭志舊文志省郡者不獨晰一縣體例則然齊召南水道提綱詳考諸派意存瞻博但齊氏未履粵土耳食疏漏在所不免如靈洲鄉屬金利司麻奢堡居縣境之西北麻奢堡又在金利司境北蜆壳岡屬黃鼎司沙隄堡居縣境之中沙隄堡又在黃鼎司西南方位不無齟齬至云正派南流至府城西南會西江水及東江水又南入於海此沿水經注牂牁江又逕鬱林廣鬱縣為鬱水鬱水南逕廣州南海郡西之說鬱水即今西江西江潦長而勢悍北江潦短而勢緩

盛夏潦長西江既過思賢濬橫恣湍駛挾北來諸水至省河直注虎頭門入於海水經注非臆說也而或以清濁驗西北兩江之分合豈知潦水行地遠衝刷沙泥多則濁倍常北江潦初發濁與西江等特其源近而流短潦水易盡遂覺清耳當西潦稍平北潦亦止北江正派自爾水清若北潦初發西潦驟至勢相撼軋西江之力足以亂北江之流沿江皆濁孰辨西北今所采錄惟以大清一統志粵東各府州縣志及史籍之明確者詳識於篇不敢就簡亦不務博焉西江合雲南貴州廣西並交趾東北境諸水故其源遠而流長其源自貴州都勻府三腳屯東逕黎平府古州南逕廣西慶遠府又東逕柳州府又東至潯州府為鬱水一名潯水

今又名右江也其一源自雲南廣南府百愛東至廣西思恩府百色又東南逕土田州又東南逕南甯府又東至潯州府為左江古名盤江會右江合鬱水也其一源自交趾廣源州為麗江東北流至廣西太平府甯明州又東至南甯府與左江合也其一源自廣西桂林府南逕平樂府又東南至梧州府治西南與梧州大江合古為灘水又名桂江今名府江也漢元鼎五年故歸義粵侯二人為戈船下瀨將軍出零陵或下灘水或抵蒼梧即此灘水也使馳義侯因巴蜀罪人發夜郎兵下牂牁咸會番禺即梧州大江也水經注鬱水即夜郎豚水也豚水東北逕談藁縣東逕牂牁郡且蘭縣謂之牂牁水牂牁江中兩山名也又逕鬱林廣鬱縣為鬱水鬱水又東逕猛陵縣浪水注之又東逕蒼梧廣信縣灘水注之牂牁漢

郡且蘭夜郎談藁其所領縣今雲南廣南卽故牂牁地貴州都勻卽牂牁之夜郎也鬱林亦漢郡廣鬱其所領縣今廣西之潯州柳州南甯及鬱州卽其地也蒼梧亦漢郡廣信猛陵其所領縣今廣西平樂梧州及廣東肇慶之境卽其地廣信今梧州治也右江左江水至潯州合流東逕附郭桂平縣有斷藤峽焉明成化元年冬十一月都御史韓雍砍大藤破八寨獠在此也又東逕梧州藤縣容江西南來注之東漢建武十八年馬援拜伏波將軍破交趾斬徵則徵貳謂官屬曰當吾在浪泊西里閩虜未滅之時下潦上霧毒氣重蒸仰視飛鳶站站墮水中指此江也又逕梧州治南府江北來會之又東至廣東肇慶封川縣過靈洲一名錦江賀江西北來會之賀江古封溪水也又東至德慶州逕錦石山漢文帝元年八

月遣大中大夫陸賈使南越賈默禱山神比南雄王趙佗稱臣奉貢賈以錦裹山爲謝後人因祠祀賈於山下稱曰錦石也或曰賈使南越時嘗設錦帳於此也又逕州治東端溪水自端山北來會之浚水自羅定南來會之又逕悅城程溪北來合之又逕大湘峽又逕小湘峽又東逕肇慶府治新州新江南來合之新江臨允牢水也新州今新興縣爲古臨允也水經注鬱水又東逕高要縣牢水注之是也高要漢蒼梧所領縣今屬肇慶也又東北出高峽山高百丈江廣一里相傳有羊化石因名羚羊峽亦曰靈羊也西江至此水受峽束勢益悍矣峽口之東江中有東洲沙宋天聖五年包拯知端州軍事秩滿而行擲硯於此也西江又東逕橫查都古婪水北來合之又南逕豐樂園又南至廣州三水縣思賢濬逕思賢

潯東流者與北江會也西江又自三水界南逕橫石嶺又逕大路峽又逕白泥又逕太平海又南至南海先登堡又南逕海舟堡又逕鎮涌堡又逕河清堡高明縣倉步水西來合之一名都合水又曰三洲水也又南逕九江堡鶴山縣坡山水來合之又注海目山出海目山之陽汪洋迤邐江面廣六七里又西南至新會豬頭山又南蓬萊山又逕鱷州又西南逕北街口又西南至江門分爲二水左逕石嘴至虎門入海右逕縣潯入於熊海熊海在新會治南二十餘里熊子山下東通江西通青膽洋南阻厓山也水經鬱水又東至南海番禺縣西分爲二其一南入於海卽此也南海漢郡治番禺領番禺博羅中宿龍川四會揭陽六縣今廣惠潮三府其地也廣州之南海番禺順德香山三水新會漢番禺縣地也西江之

源中有牂牁山故昔人以名郡又以名水也西江之水豚鬱爲大灘次之而發源牂牁匯流鬱林下合灘水故西江或稱牂牁江或稱鬱水或稱灘水也逕縣西者爲西江經流故於新會入海之地稱曰江門也地理志鬱水首受夜郎水東至四會入海過郡四行四千三十里四郡牂牁鬱林蒼梧南海四會南海屬縣也天下之水黃河岷江而外西江爲大矣水經又謂鬱水其一又過南海番禺縣東南入於海者西江注思賢潯東流至三水之蒼江與北江湏武湓合流過西南潭下南海靈洲出石門舊志謂靈洲山下鬱水逕焉是也今西南潭水口淤塞其一東流至紫洞別趨鼎安吉利龍津沙頭東南入海其一逕紫洞南趨王借岡東過石灣至黃鼎街下佛山汾水其一逕蟠岡南趨五斗口入海其一逕三家店倒

流神安南注三山北匯珠江入海其逕九江堡海目山南流者一注甘竹灘一注仰船岡並可達順德香山入海此皆西

江支流也

據郭通志黃通志阮通志大清一統志肇慶府志新會志廣東輿圖史記漢書後漢書水經注元和郡縣圖志太平寰宇記夷堅志輿地紀勝明史方輿紀要螢照閣集區大司徒集采訪冊參修

謹案南海志云西江入海分二派西一派為經流出羚羊峽南行至新會江門出厓門入海東一派為支流過思賢滘趨省治會珠江出虎頭門入海黃通志主漢書地理志水經注而邕其說郭郝阮諸省志因之張府志郭魏縣志因之而或疑西江自高要三水逕縣之西界直下者為正派則過思賢滘以東至省治乃北江正派西江支流至此消長有無靡定不必牽強紀載豈知廣州有北西東三江以省治而分北

自大庾南韶連滇湟武諸水南注於三水縣在省治之北故謂之北江東北自安遠界南下龍川之水以其在省治之東故謂之東江西自端州受黔滇楚粵西甌西來之水在省治之西故謂之西江三江之水西江為大東江次之北江又次之東江至省治東南波羅江乃合西北二江其水由府治稍遠若西江雄悍橫恣甲於三江既至三水境與北江會北江且當避道而行則自三水至省治東南北江所逕之處即屬西江所逕之處西江之支流即可為北江之經流如禹貢自梁州岷山導江歷荊州至揚州東裔入海中間所匯漢桓潛沱澧滄浪三澨諸水彭蠡震澤諸湖而總括之曰東為北江東為中江入於海以此例

之諸志典確良可據也茲詳載之爲留心水利者獻芻蕘焉

東江卽古龍川水兩源一出江西安遠縣南山南流曰鎮水入廣東和平縣北界大竹園之東又南有小溪自西南來會折東北流會北來一溪又東南有合水自北來會卽東北源也一出江西安遠縣南曰鶴子水東南流入和平縣東北界又東南會東北二小水折而南流與鎮水合曰合水又東南有水自東北來注之折而南有紫雲山水自西來注之又東南受北一小水折南受西一小水又東南受東北一水及西一水卽龍池水也又東南經龍母山西北有一水東北自江西長甯縣北山合數水南流而西來會曰尋鄔水今日尋都江又南流折而西受東南來一水又西流受北一水又西受

東南來之太乙巖水又西經新田鋪北又西南流而和平縣城左右諸溪自西北合數水東南來會南流經大壩西及東水壩之東曰東龍江又東南數十里折西南流又南經龍川縣城東有官坑水自東北來注之又西南流經縣城南受城西北來小水又西南受北來小水又西南受西北來小水折南經藍口司東受東南一水又西南流經洪軍塘南又西折而南受西一小水受東南一水又西南流至河源縣東北有新豐江西北自連平州合諸水東南流至河源北境與西來之長甯縣羅紋水合而南來會江流大盛又南經河源縣城東又南受城南西來一水又南受西一小水又東南流有神江東自咸魚村合數水西南流來會又有一溪自西山合二湖東南流來會又南流受東一小水又西折而東有欖溪東

北自永安縣來會又西南經檳榔潭北折而東南經釣魚村蓬瀛村西又西南經草鞋瀝北又西折而西南至惠州府城東北有淮水自南合數水北流經城東而北來會折而西經城北有橫槎水南自城西來會又折而西北流經博羅城西南又西北有榕溪自東北來注之溪口即合竹洲稍西有雲母溪北自羅浮山南流會西北之香溪來注之溪口即鮎魚角洲也又西南流有水南自銀瓶嶺松柏嶺西北流來注之又折西北流至馬嘶洲有水自北來注之又西流至東莞縣東北之江口北有增城縣會東北龍門縣諸水南流南有新安縣柑坑山水北流并來會東江於江口歧為二支一西北溪會鰲溪水折而西南一西南流會柑坑水又西復合經東莞縣城北境之官海鎮南京口司北又西有綏福水西北自

古華山龍岡來注之又西受自北來之南樵嶺水江至此已西南與諸港相接支洲經絡州嶼其南即東莞西境之中堂司也東江又西受北一小水折西南流經番禺東境之鹿步司東受北來羅岡山溪其南即金釵營大洲也又南出口至獅子海則珠江合西北兩江之水經波羅江東流來會又南至虎頭門入於海據齊召南水道提綱修

謹案東江水至鹿步即會珠江入海無西流者其對岸為番禺之菱塘司地水道提綱所云又西者誤也又案阮通志云東西北三江為粵東之大川皆匯廣州府入海故列於廣州各縣之前俾閱者易於參檢又考南齊書州郡志云西南二江川源深遠置都護專征之任則東江又兼南江之名矣

南海縣

南海在縣南水道百里自州東八十里廣州記作百里有村號曰古

斗自此出海浩淼無際東流閩浙南通島彝潮源於東南大

洋入於虎頭甲子二門以達於斜西海其南則入於厓山故

曰祝融之汪南海也停水曰汪據元和郡縣圖志太平寰宇記郭通志張府志參修

謹案南海志云南海不在今縣境以粵東首縣形勝

宜詳且縣名所自昉也仍舊志錄之

西湖亦曰仙湖在古甕城西偽南漢劉龔之所鑿也其水北

接文溪東連沙澳與藥洲為一長百餘丈歲久淤塞宋經畧

陳峴疏濬之輦龔故苑奇石置其旁多植白蓮因易名曰白

蓮池其東偏今有仙湖里遺焉據廣東新語修蘭湖在雙井街寰宇記引南越志云番禺縣北有三湖一曰

沈夜二曰蕙湖三曰芝蘭湖父老云沈夜者本層山連岫承

嘉之末一夕而沈故名今惟芝蘭在席帽山下芝菁藹景紅

花亂曰素鱗紫芥此焉游泳餘皆湮新語云其水常瀦今亦

亡其地亦猶曰蘭湖里云昔周某在里治園得斷石有詩云

芝蘭生深林無人常自芳君子處階前明德惟馨香游魚物

置羅好鳥名鴛鴦微風動林岸此心共迴翔非魏晉人不能

道據太平寰宇記廣東新語大清一統志楚庭裊珠參修

柳波涌在城西十里郭通志作十五里又西南二十四里曰奇堪涌

據廣東輿圖郭通志參修

荔枝灣在城西五里偽南漢昌華苑顯德園在焉五代史南

漢乾和五年遣洪昌祀襄帝陵於海曲至昌華宮即此古圖

經云廣袤三十餘里今皆民居南越志江南洲周迴九十里

有荔枝洲上有荔枝冬夏不凋即此水也踰龍津橋而西煙

水二十餘里人家多種菱荷茨菇薤芹之屬其在半塘者有

花塢有華林園皆偽南漢故迹據太平寰宇記廣東新語大清一統志郭通志參修

白鷺潭在珠江上流二里水大而深每大風雨有白鷺浮出

則舟楫壞順治丙申五月朔二白鷺狀如小艇隨波上下時

有風雨舟經此者皆見以小銃逐之飛數百步沒於水相傳

黃蕭養作亂船經此潭白鷺為之先導亦妖物云據廣東新語郭通志

參修

大通港在城西南二十里有大通禪院其東有平陸松林竹

浦諸水俱匯流於海南二里為英護浦亦名腰帶水據廣東輿圖方

輿紀要郭通志參修

拾翠洲在郡城西南三十里古有津亭唐陸龜蒙詩云候吏

多來拾翠洲是也明建華節亭於此據大清一統志郭通志參修

沈香浦在城西北二十八里江中晉吳隱之投沈香處晉史

云隱之歸自番禺其妻劉氏齋沈香一片重一觔隱之遂投

於湖亭之水後人謂之沈香浦亦謂之投香浦圖經云在石

門西華寺在浦之旁故有亭曰沈香據太平寰宇記南海百詠廣東輿圖參修

謹案太平寰宇記作二十里廣東新語作十里郭志

作三十里

石門水一名貪泉出縣西三十里平地即晉廣州刺史吳隱

之飲水賦詩之處晉書元興初吳隱之為廣州刺史未至二

十里地名石門有水曰貪泉相傳飲其水者易廉潔之性隱

之酌飲而賦詩曰試使夷齊飲終當不易心晉中興書云吳

隱之往廣州飲貪泉為堅潔之性南越志石門之水俗云經

大庾則清穢之氣分飲石門則滄素之質變李汧公勉為嶺南節度使罷鎮行到石門停舟悉摻家人犀象投於江中而去即此水也番禺雜志云劉龔惡其名運石填之或云為寺僧所塞今未詳有唐天寶中陳元伯所撰碑銘今昇置廣平堂中南越志云漢將田千秋征南越全軍覆沒之處恐誤據元和

和郡縣圖志李肇國史補太平寰宇記輿地紀勝南海百詠參修

扶南水在城西南十六里一名扶溪民居環錯多菱茨之利又西北三十里曰巴由水此水在胥江羅包出境流至石門

據方輿紀要郭通志參修

天生塘在城北二十二里春溢冬涸歲旱禱之有應張府志

龍湫潭在天生塘東石壁數仞飛瀑懸瀉成潭全

蟾溪北由平地堡過沙浦南注鹽步西北由扶南梯雲二堡

過顏邊溪頭新桂東注鹽步兩水匯合又西由五斗口汾江倒流而來過黎邊新桂陸邊水藤三水匯合直趨石龍海東迤合石潭之水達於大通堡界石龍海有灘石如長虹橫亘兩岸中斷如削缺處可通舟楫傍有穴潮汐吞吐聞澎湃聲蛋戶善泗者蛇伏而入見巨魚張口如箕揚鬣噴沫不敢近乾隆間有持釣索入者魚碎其腦竟死穴中南海志靈洲竇小水由竇口直入北至桃子堡袁竹坳村象岡文旒二嶺之水歸焉乘潮可通舟楫

五汊口在夏教堡東北上達佛山下通省城及三山平洲順德番禺下有鯉魚沙牛眠沙等處俱同上

沙口在大富堡王借山陰瀆鬱由西南直注歧分南北為往來要津西自張槎汎至沙口三十餘里北自長船尾至岳利

沙十餘里東南自文昌沙至文埕海十餘里每遇潦漲沙隨水至浮積壅塞河道淤狹舟行艱滯往往停泊候潮道光十四年巡撫祁墳率僚屬紳民籌疏之以在籍山東運使李可瓊內閣中書梁藹如主其事捐集銀二萬七千兩畚沙八萬六千井三年而河道遂通同治十一年相距三十七年矣復積沙壅塞諸紳上請大府集捐疏治開廣鑿深工程費用皆倍於前閱四年而工竣據南海志采訪冊開河徵信錄續徵信錄參修

九曲水在沙丸堡旗峯山西北由大欖堡白沙橋至鹿眠村九曲而抵虎頭岡麓名九曲水經象岡大冲與西根竹橋二水合流而東出湖馬橫馬大江大步以至湖洲又名環帶水西江由羅濛峽南流過沙涌湖洲與匯流而東注珠江南海志龍潭在麻奢堡岡美村相傳有龍潛其下

甯溪在豐甯堡唐頭鄉鎮南門外由黃芝竇出黃鼎司前早晚潮汐消長可駕小舟以通來往

鷺塘在大厝堡涖莊迎辰里內塘北有古松三株蒼翠鬱茂前明時有雙雁浴此見人不驚里人異之翼而歸是夕其妻即誕一子雙雁翔鳴而去其子長任福甯衛經歷俱全

西樵下有湖環山東南隨水勢曲折而成長巨六十餘里湛甘泉嘗標為二十八曲與弟子棹歌其中山上有三十二泉皆瀑布也其尤大者水簾山四圍皆江水環有七十二峯若芙蓉注其跌山上又有天湖方丈襄常蓄二瀑布為之亦稱

三瀑布湖瀑一出大科峯北麓為雙泉流至雲表村為西竺泉注於寶鴨池乃為瀑布而下其一出小科峯北麓合碧雲二泉注觀翠巖又合紫雲溪逕白山村伏虎臺乃為瀑布而

下其一出諸度坑歷銀瓶盤龍石而下又有二小泉一出盤龍石側繞石泉書院門而東一出後岡浮石並會東湖之水而入天湖天湖凡受大水三小水二煙波浩淼望若無際流至山下復為湖下湖之水即上湖之水也每當雨過輒有飛魚挂林杪嘗人截湖口而取之湖口有方子釣臺廣東新語西樵有三十二泉出於大科中峯之南天峯之北東流兩厓之下瀉於雲谷者為左天泉南自福老峯流於天峯之南瀉於雲谷為右天泉二泉最高西樵第一泉也雙流過仰眠峯飛瀉於噴玉巖下出於大坑又南則四峯之泉注洗研池出於厓子坑流於九龍洞出於西坑口至大坑會噴玉泉而東入於江西則煙霞洞泉伏流洞口會於錦巖泉又會於鐵泉又會於龍泉流於石子出瀉於樂堯莊為左垂虹泉其雲端

井泉二溢流於龜頭社瀉於樂堯莊為右垂虹泉合流洞口出於羅漢巖達於黃岡而西入於江北則大科峯泉流於西竺會於寶鴨池西出會於飲馬泉南下為瀉錢泉歸於天湖其碧雲三泉一出清流館一出山坳一出村邊盈積五六池瀉於觀翠巖北會於階梯泉與貴峯大槽之泉歸於天湖流出於豬坑注無底井又注官山下而北入於江南則雲路二泉流於村南出於大鵝山下帽峯達於江村而南入於江東

筆記

謹案阮通志云西樵溪泉極多三十二泉其最著者西樵游覽記增至八十有二

居士泉在舊巡撫廳前宋紹興中折彥質以忤秦檜謫至廣州鑿井得泉甚美人號居士泉又曰折公泉據羊城古鈔修

訶井在光孝寺南廊外僧舍中古圖經云寺有訶子取此水和甘草煎乳白而甘又謂之訶子泉卽此是也人誤指爲羅漢井

西來井在光孝寺六祖殿後相傳智藥三藏卓錫得泉用以溉菩提樹且曰此乃靈源與吾西天寶林不異後人因名西來雖大旱不涸井與旗舍相鄰居人多就汲焉俱同上

羅漢井在城內光孝寺西廊卽古乾明井地相傳六祖洗鉢於此據粵中見聞光孝寺志參修

東坡泉在西城內天慶寺蘇文忠公初鑿得一石狀如龜泉湧出號龜泉清冽亞達摩泉瀉祐開經畧使方大琮浚泉護以定林廢寺鐵井欄大琮有鐵井欄銘據南海古蹟記修

弔碑古井在城中六榕寺旁花塔街井闌甚小井內甚大有石碑橫於水上長四五尺其半在井牆土內形如弔卦於井中者故名味甘美居人取汲於此據阮通志修

五眼井在西察院左雙眼井在石馬槽據南海志修

甜水井在坡山右甜水巷

流水井在興隆街東通粵秀山泉俱同上

四井新唐書地理志南海縣山峻水深民不井汲都督劉巨麟始鑿井四今城內有日井月井乾明井疑卽其故址也據大清一統志修

日井名日泉井在州治野渡北舊青紫坊千佛寺側每夜輒有一日在其中日出則井中先見日太陽照映與月星相望今湮魏志作日泉井在詩書街龍王廟殿下恐誤據輿地紀勝黃通志

廣東新語南海志參修

月井一名月泉井在城內西南古月華樓下今鹽倉街舊月泉菴址金花夫人廟神座下有巨石覆之每夜輒有一月在其中月出則井中先見月映照井底光熒澄徹與日井相望

據黃通志廣東新語參修

星井亦名星泉井在城西六里古金肅門外繡衣坊始鑿見星於井故名今在文瀾書院後時有光若星

據輿地紀勝廣東新語南海志

采訪冊參修

龍起井在仙羊街小巷內宋寶祐元年癸丑五月二十六日午時侍讀鍾顯孫屋後古井有龍昇天時適生子因以龍起名稱神童及第

據南海志修

珊瑚井在城西一里蔣穎叔云葛洪嘗鍊丹於此而海神以珊瑚為獻井旁多蒔葦草每際三春上巳游人多往來采擷

以擬靈芝

據南海百咏羊城古鈔參修

蟹眼井在北門外石坎底湧泉如蟹眼故名為省會第一泉

南海志

煙雨井在會城東南大通濬古寺中晨熹初散常裊輕煙所謂大通煙雨是也

據南漢春秋修

太保泉明徐志文記云南海官溪一山屹於中流名曰小金山又曰靈洲山正德乙亥仲夏欽差鎮守兩廣征蠻將軍太保武定侯郭公世臣以公事自蒼梧下五羊經此勝而登焉俯察地脈指曰此穴可井而有甘泉佐特定禪鑿之味甘而冽咸曰此太保泉也

據嶺海名勝記修

狀元井在黎涌鄉南漢狀元簡文會所居故里也明倫文敘居其地亦狀元及第云

據南漢春秋修

木鄧井在西樵金釵峯北仙人木鄧子所鑿深可二尺水白如乳其味迥異於常云

據西樵游覽記修

紫姑井在西樵九龍洞厓子坑上世傳紫姑仙鍊丹於此井凡二各深五尺不溢不涸汲以禱雨輒應其旁有丹竈舊址金銀井在西樵噴玉巖水簾洞之下烏利道人丹井也一赤一白相距尺許注赤水於銀井赤水不白注白水於金井白水不赤浴之可療痼疾云

俱同上

同菴井在張槎堡聖堂岡下孝廉梁殿華明經龐嘉耄同闢一名聖泉味清冽

南海志

西社井在金紫堡袁邊鄉鄉為袁姓聚居東西各一井朝夕咸汲而西井尤清冽日久圯廢鄉人世平捐資倡修踰年忽甘如飴甲寅之亂西社百餘丁無一從匪者始悟井泉之兆

鄉中實受其福也

據采訪冊修

番禺縣

牂牁江一名珠江即西北二江下流也珠江一名沈珠浦士大夫燕遊餞送多在此在城南五羊驛前石排湧出海中其平如掌形如海上浮珠上有慈度寺

番禺志作慧度

受靈洲之水合鬱水之流自石門東南匯於白鵝潭過郡城下東趨虎頭門而達於海江以海珠得名城南大江中巨石平敷水面長二十餘丈廣半之宋時李昉英結茅讀書於此因移慧度寺其上後人因於故址建祠立像以祀昉英順治四年總督佟養甲城之建四門東曰浴日西曰朝宗南曰馴鯨北曰安瀾屯兵守禦雍正九年布政司王士俊建傑閣於得月臺中為遊謁祖餞之所周遭古木擎雲掩映樓閣波心隱見如海上蓬

壺當春木繇花發蘸水燒天上下紅光奪人心目如龍女水
面擎出十丈珊瑚夏則綠蔭罩波儼成蝶附泊崖跋履憑眺
高樓煙水茫茫蒼然四際昔人以海珠及浮邱海印為三石
而孤嶼媚中流惟海珠勝矣昂英於寶慶二年探花及第後
張鎮孫復於此結龍頭會以大魁自期亦狀元及第宋末經
畧張鎮孫與蒙古將塔出戰於海珠寺敗績蒙古復陷廣州

據大清一統志黃通志廣東輿圖南海志番禺志參修

謹案海珠寺今屬番禺縣地然珠江源於三江三江
多屬南海者故南海志舊仍詳列檢阮通志以走珠
石箸南海而珠江詳志番禺謹循其例亦以存實也
瀝濬堡江即古東衝與州前江相接去城十餘里宋書孫處
傳由海道襲盧循於番禺即此黃通志

蜺江東衝分流於西朗達於蜺江合於波羅江俗呼白蜺壳

江張府志

波羅江唐韓愈碑扶胥之口黃木之灣即此在南海神廟前
嶺南海水之會也羅浮雖夜半見日然在山巔高處海隅卑
下此獨見若凌空倒景光怪靈幻最為奇觀在城東八十里
南海神廟西有小邱屹立上建浴日亭宋蘇軾有詩據廣東輿圖張

府志參修

鳳水從高而下巨石激散如鳳舞之狀在亂石山東二十里

源出昭陵山上有黃陂據郭通志輿地紀勝參修

月溪在亂石山下張府志

琵琶洲在邑東南三十二里江中閩浙舟楫皆泊於此洲突
起高十餘丈上有三阜形如琵琶明萬曆戊戌光祿卿郭棐

寺丞王學會主事楊瑞雲請於院司即洲上建九級浮屠屹

立海中以壯形勝名曰海鼇塔之北建北帝宮旁有海鼇寺

制府戴燿陳大科巡按御史顧龍劉會皆捐俸焉據番禺志

白管溪在番禺縣東北裴氏廣州記云白管溪當川中沸湧

如爐火煎油聲去邑三十里即龍眼堡張府志溪水也平川

中湧出周圍丈餘據黃通志大清一統志寰宇記參修

沙灣水在城西南五十餘里由青蘿障而東與韋衝之水自

東而西流至虎頭門入海由牂牁江分流自南海五斗口流

入東經沙灣司南又東經浮練山礪山南合波羅江入海又

一支自縣西南分流曰白蜆江東流逕萬松山南至東衝入

大江據大清一統志阮通志廣東輿圖參修

銅鼎溪在博山下南越志天清水澄見其鼎鉉張府志

老鴉江在邑北從化界番禺志

沈夜湖南越志番禺縣北有三湖一曰沈夜二曰蕘湖三曰

芝蘭湖父老云沈夜者本層山連岫以永嘉之末一夕而沈

故曰沈夜三湖今惟有芝蘭湖在席帽山下餘皆堙據大清一統

志寰宇記參修

菖蒲澗一名甘溪裴氏廣州記菖蒲澗盤石上水從上過味

甘冷異於常流南越志昔交州刺史陸允之所開也至今重

之每旦輒傾州連汲以充日用雖有井泉不足食太元中襄

陽羅支累石澗側容百許人坐遊之者以為洗心之域一名

蒲澗在白雲山東北五里舊志云澗中多九節菖蒲世傳安

期生採菖蒲服食之以七月二十五日於此上昇郡人每歲

是日往澗中沐浴以祈霞舉今其地有碧虛觀其前有煉丹

廣州府志 卷十三 輿地畧五 三

井其陽為滴水巖下有簾泉水皆甘美飲之有金石氣匯為流杯池因澗曲折而出為行文溪水注於粵秀山麓其左為菊湖其右為越溪至北山下為甘溪薛薛水澗旁有石名禹餘糧有五色雀恆自羅浮來止

據寰宇記嶺海名勝志阮通志番禺志參修

甘溪在越溪之上漢刺史羅宏浚時常有人詣蒲澗得九節菖蒲忽大雨水漂去後得諸靈洲水上始知其本相通云

番禺志

越溪在菊湖之右會東溪北山下為甘溪去邑城東北五里吳刺史陸允以海水味鹹導以給民唐節度使盧鈞後加疏鑿以濟舟楫更飾廣廈為踏青遊覽之所傍水皆種木繇刺桐南漢廣之為甘泉苑苑中有泛杯池濯足渠避暑亭即今之薛薛水也

同上

越臺井在越秀山之西名越岡井一曰趙佗井一曰鮑姑井明一統志相傳晉鮑靚女葛洪妻所汲處葛洪妻嘗行灸南海善灸贅疣唐崔焯遇姑得越井岡艾南漢劉龔號玉龍泉即今九眼井井鑿自尉佗時深百尺泉味甘冷宋番禺令丁伯桂開九竅石覆之因名九眼井昔有人誤墮酒杯於此井遂流出石門古詩云石門通越井案嶺表錄異云井在州北越王臺下深百尺餘磚甃完備番禺雜志亦云越井半存古甃曰趙佗井廣井泉率鹹鹵惟此井可以煮茶後井雖塞猶有井形南漢禁民人汲潘美平劉氏後方與眾共今此井在悟性寺前甘美為一郡之冠後來乃亭其上榜曰達摩井初無所據祇何公異作南征錄及圖經云達摩初來指其地曰是下有黃金取之不盡民競掘之數丈遇石穴而泉迸湧達

摩云卽此是也何公乾道中入南蓋此井已在達摩泉之先好事又爲此說以附會之今越岡無他井卽此無疑矣又嘗讀唐子西集有遊廣州悟性寺詩其結句云泉脈來何處中含定慧香則亦指此爲達摩井南漢號玉眼泉又謂之天井又名清泉今井南衢猶以清泉名據南海古蹟記寰宇記南海百詠黃通志大清一統志阮通志南海志番禺志參修

謹案越岡本不隸南海今循阮通志例仍入番禺

白鵝潭卽城南江近西四十里匯支水爲潭番禺志

簾泉在蒲澗東匯爲流杯池沿澗曲折而南爲行文溪水流入金鐘塘注於粵秀山麓又東北與東溪水會注於江上有晉廣州太守羅尙疊石遊觀故址張府志

文溪在城北張府志源出簾泉十道至番禺北津水流入

金鐘塘分上塘下塘今名簾平水疑卽此番禺志

九龍泉在白雲山鄭安期隱於此初無泉有九童子見須臾泉湧因名下爲大小水簾洞相距不三百步又名安期井泉味甚甘烹之有金石氣宋方信孺有水簾洞詩據輿地紀勝黃通志番禺志參修

學士泉卽今所稱鷄爬井在廣州府城北七里明天順中學士黃諫謫廣州品其水爲嶺南第一井旁石黃諫鑿之箸有

廣州水記據大清一統志番禺志獻徵錄參修

虎跑泉在白雲山寶象峯前黃通志

泰泉在棲霞山舊志昔景泰禪師卓錫得泉故名又云泉初湧時雙螭出焉宋李昉英有文溪小隱軒及泰泉玉虹飲澗二亭舊址明洪武初孫蕢築白雲山房於其上今已廢矣名

勝志曰景泰者六朝時僧梁大同中居羅浮水石樓下常至山頂見池有蔬葉泰曰此泉當通人境乃書偈投水流出王氏池中因施其地為寺刺史蕭譽每召與語朝至此山暮出羅浮云明黃佐建泰泉書院據郭通志番禺志參修

八角井康熙十年冬城隍廟井水竭道士夢神示以廟後有泉處掘之得八角井甃石完固大一丈餘水溢而清先是俗諺語云未有城隍先有井未有廣州先有城其年代不得而知也番禺志

煉丹井在蒲澗一名安期井碧虛觀前煉丹巖下數十年不汲其味常甘烹茶浸果有金玉氣井欄上刻有八卦黃通志雙井在城北施水巷旁井小而水甚淺下有雙孔春夏溢出

地上番禺志

流水井在興隆街東通觀音山泉番禺志

程浦溪顧微廣州記云浦溪口有龍母養龍裂斷其尾因呼其溪為龍窟人時見之則土境大豐而利涉寰宇記

謹案阮通志云程浦溪樂史系於南海之下今南海番禺二縣皆無此水附識於此

慕德里帽峯山澗水三支中支曰華坑東支曰良坑西支曰清水坑次第灌溉田畝中支餘波出竹料東支出黎家塘西支出龍塘均入流溪河採訪冊

順德縣

順德去海尚遠不過港內支流環抱諸村落而前明以來所謂支流者當時類皆遼闊帆檣衝波而過率謂之海其名曰甚繁陳志未能細放其向背通流之地近年則滄桑闕久有

前通而後淤者有昔廣而今狹者而沿其舊名則仍統稱曰海爰於縣內川流分地臚載而先舉其名與所經流地及去鄉堡之最近者各為註明庶綱舉目張可以因端竟委焉

德志修

碧鑑海大良南 桂畔海大良東 三江瀝小灣東 疊石海桂林東南

甘溪東北 潮海容奇南 錦鯉海馬齊北 江村南石涌西 魚

塘海龍津北 三漕海水藤東 木頭海馬甯南

庚流海平步南 文字海磧平西 木頭海馬甯南

鷗青步海桂洲南 郡馬海龍津東 企犁海西 仰船海馬甯南

杜母海鼎新南 倒蘊海龍江南 鱗鯉瀝白藤南 三瀝海雲步南

鼎新北 福海前 均沙海水藤北 河聲海龍江東 大

沙尾海馬齊西 洪濛海昌教西 甘竹灘甘竹西 碧灣海白藤南

三合海龍江北 獅嶺口龍山東 逆流海勒樓北 黃涌海額

北新良磨刀海 岳步北白廟海 石頭海江尾 白蛇海甘

北林東橫流海 昌教鐵船海 北笏海江村 金陡海前 羅江海沖

斗馬甯海前 沙背海華光 九曲海華光

碧鑑海在城西南一里其水澄碧因名循城而東為錦衣涌

旁有煉丹井自碧鑑海鑿三百餘步達城東西曰學士涌舊名

石在城西北亦通碧鑑皆知縣錢溥所鑿源於粵江流至縣

其水環合北三十二里曰三漕海西二十里曰錦里海西八

十里曰洪濛海北四十里曰庚流海其水向庚而流故名皆

小川也自粵江分流至此曲折環旋色澄而碧如鑑據方輿

通志阮通志

桂畔海在城東北里許自倫敦分流東至太平山外會碧鑑

入香山海此與壘石及黎村之掘濬桂林之白鴿嘴其底皆有枯蠔壳重疊積產長竟數里中流海心尤高凸形同劍脊自然生聚流深故不礙舟楫蛋民往往盜挖兩岸游手者利其賄輒與為勾連撈出即市於灰爐熾火煨為蠔灰為圻墁牆瓦之用流通廣則採挖多水腥濁遂不可入口而爭毆攘奪之事亦出其中附近紳士止之不可則請官為勒石示禁穀塘為盜賊淵藪地方官必當嚴禁動以由海至岸田必塌卸紳士為地方謀保護為天地留有餘何嘗非節民之義即以田塌卸為言思為田廬保衛亦未始非養民之惠也粵地如東莞番禺諸海皆有不獨此地為然據順德志修

雍正間許令填塞旋開復乾隆中城紳復請官堵塞改由三河四河紆迴而入潮退行礙濬口又苦無孔道寒暑雨雪不能舍舟陸行紳耆又公請馮令勘明示禁省中上憲行令委員詳察申府核明內云志書雜志載新濬為邑門戶古蹟原屬疏通其山川論及云濬出入有天馬破頭迎送不過粵人風水之談堵塞誠非便利據圖水由此洩有利無害覆司詳撫行令勒石濬口永遠遵行而倫敦為出濬首村亦公附一石其後日久淤塞嘉慶十一年紳士復援案以請再為勒石十四年洋匪張保撲岸內擾因權宜堵塞逾年事定仍開通如初至道光丁酉復行淤塞前邑令威公乃發閒款萬金使沿河挑濬司事者以挑出餘泥就近運於濬外倫敦海心堆為兩壩壘石其上欲藉引來水以刷濬濬流為一勞永逸計

無如水自東來拒於壩已礙舟楫遇西潦盛漲經甘竹黃連
來至羊額小海一束其水原屬暢行無窒驟為壩阻大流壅
滯潮挾沙至濬口愈積愈淤水患日增非當時意料所及也
他日再事疏通宜運去濬外積泥使復其舊庶利及於附近
諸鄉不淺耳

金斗海在石涌古樓兩堡間

石岡涌在石涌堡

大演海從錦鯉海經塘利村入龍眼村數折而東過沙浦又
東北入金斗海

北笏海從江村來逕南水村至龍眼村分為二東注金斗海
北出四河入新濬達縣城上同

鐵船洲海在碧鑑海南據張府志修

潭洲海在小灣堡上同

北潮海在馬岡陽水由容奇小灣入香山海與鵬涌並在容
奇堡青步海在桂洲堡據順德志張府志參修

馬岡海村以山名海在山前直下桂洲堡據順德志修

寒落海在黎村堡喜涌村南自倫敦入黎村名掘濬今名崩通自
黎村逕喜涌至雞洲入海其支流曰大通濬逕大洲入海上同

三漕海在城北二十里黃連鄉左出南海之西樵山至桂林
與疊石海匯北經堡後出黃涌南經堡前出江村自三漕下
為金鈞沙沙東有細陳村海通高陽鷺洲白廟海環注堡西

據順德志採訪冊參修

三合海在勒樓堡西南其下有石穴每大風雨有黑魚浮出
大可三四丈逆流在西北東近錦鯉通橫流西出九曲仰船

洋上接杜母故名三合

鯿魚海在黃連右南畔海在黃連前新良海夾新良黃連間並以村名曰黃涌海

仕版海以村名逕村前達三漕其支別接倫敦海逕羊額良

仁涌左出達三漕俱同上

錦鯉海阮通志在逢簡堡馬齊右冲鶴左上湖三漕下入橫

流西出仰船海江村實中握之水自鷺洲入者為眾涌據順德志

張府志

三瀝海福海俱在福岸堡三瀝一紆出江門一達香山海福

海以福岸名同上

鷺洋海在鼎新堡新涌在雲步堡據順德志

石步涌攬俱在江尾堡同上

碧灣海鳧海橫石磯鱗龍瀝俱在白藤堡在白藤江尾間同上

謹案順德舊志碧灣屬江尾堡

石頭海在縣西南七十里流逕甘竹堡西通香山據黃通志

仰船海在城西四十里甘竹堡來逕南海九江出三瀝沙西

達新會直入香山海據廣東輿圖修

謹案順德志云仰船海即仰船洋張府志重載誤

甘竹灘在城西六十七里獅子嶺之前灘石奇聳聲如雷霆江水海潮相為吞吐水經南海九江而東下過石壁即激成

灘貫堡東入勒樓夏潦尤盛語曰水長水下灘水消水上灘言潮自灘入後自灘出也舟每紆象山之陰避之謂之偷洋

澹石壁北望海目南盡海門北挹大雁上與擔杆峽下與三瀝沙相應援賊不得第七澹入勒樓不得越甘竹度九江不

得渡馬甯入橫流灘為之也企犁在其西據廣東輿圖
獅嶺海第七澹倒篷灣杜母澹俱在甘竹堡洪濛海在昌教

堡據順德志修

龍江在城西北八十里即西江水也流入縣界經龍穴山之
陽又東入南海縣境會入於北江據方輿紀要

橫涌山在龍江堡鳳山西據阮通志順德志參修

鼎峙潭河彭海發源西樵俱在水藤堡同上

魚塘海發源西樵東流入縣界經桂林都粘南入疊石海據阮通志

龍澹水順德志作龍頭澹

出縣西南三十里龍頭堡龍頭山南流入

於海據方輿紀要修

赤花海在龍頭堡文溪庚流海均沙海俱在鷺洲堡據順德志修

疊石海在縣北二十七里桂林堡對岸則為黎村之烏洲喜

涌而大洲而雞洲中為番禺之沙亭來逕南海石灣北引魚

塘西會黃涌入三漕達香山海據郝通志順德志參修

林頭澹又名白鵠嘴在林頭村西南據順德志採訪冊參修

洲頭海在葛岸堡流自莊步至歧而北經平步登洲會於魚

塘西經水藤會三漕據順德志修

文字海在石碯堡水自東南入成文字因名同上

橫海白蛇海郡馬海魁涌大槎涌鮑江俱在鷺洲堡據張府志順德

志參修

磨刀海在登洲堡分流為三岳步東通龍津庚流南通北澹
菰菱北通西淋永樂中黃鼎民請湮黃瘠海以杜北注何大

哥義哥兄弟力陳當道寢其事即此據順德志修

麗澤泉在學內之麗澤祠前康熙六十一年知縣樓儼因修祠疏祠前沼得奇石石罅清泉迸出名曰麗澤泉後歲久湮塞道光三十年設局修志同人於故址復鑿得泉源泉涓涓不竭味甘冽鬻以石欄以原額名題其上

鳳井在城內水關井欄八角角皆鏤鳳形今廢旁有門榜曰鳳井流香

紅泉井在城東神步山側歲端陽日午有赤土浮出過午復沈

煉丹井在城南元真觀昔道人游隱堂羅務光嘗修煉於此俱同上

還金井在羊額村昔何絳以友金藏此後老而還其子井今存過客每憑臨而歎焉據五山志林順德志參修

石甘井在古樓堡甘源村即甘園梯雲山麓其泉上出味甚清冽又明成化中村北突出一石村人許歧峯鑿之成井據順德志

周鑑井在小灣堡太平山麓泉流出石穴晝夜不息味清而甘山遊者每從瀟茗憩息終日

萬福井在昌教堡光輝村天后廟旁相傳開自趙宋時味香冽食者多壽見廟記

節義井在桂林堡槎涌村昔鄭文戴妻楊氏以殉夫投井死故名俱同上

龍池井在城南十里容奇堡相傳以為龍穴據郭通志順德志參修

風井在江尾堡美山旁一石孔有聲則風且雨粵語

石龍吸水在美山之麓石氣逕趨至滄溪如龍頭昂起中有

數穴潮汐相激鞺鞳有聲據順德志修

順峯井在雲步堡順峯山北味清冽合藥能療病

四方井在白藤堡上村其泉甚清飲之已疫俱同上

回蘇井在城西北七十二里阮通志作八里水藤堡冬暖夏涼飲之

已病據郭通志順德志參修

硃砂井在水藤提督里泉甘冽相傳里人馬驄所濬下有石

穴色正赤故名遇疫飲之輒無恙村人常以煎藥據順德志修

漱玉泉在龍山堡鳳凰山下清泉自石噴出居人於流上下

方鑿石為坎此滿則溢注於彼流而不盈俗呼為長流水味

甘冽據龍山鄉志修

清濁二泉在馬甯墳頂山下一最清一最濁相去不盈尺何

山人東羲繪圖羅天尺記之曰小滄浪據五山志林修

屈井泉在龍山堡岡貝社旁相傳掘井時有道士笑指路旁

石曰以此作欄可乎石長數尺道士以足翻石石隨足轉屈

曲如環只留一縫小僅容線因以名井據龍山鄉志修

金竹泉在龍山堡金竹里舊傳其地多竹故名品泉者謂龍

山之泉漱玉為第一次則金竹云

馬乳泉在龍山堡湖園寺上為天馬岡天湖之左臂也泉出

其胸故名水亦香冽嘉慶二十四年里人贅石為池如半月

形題曰湖山漱潤

蟹眼也在龍山堡大山麓水僅盈勺經年不竭其乾潤可驗

豐歉

北華坑水在龍山堡北華坊源自天湖來至此大匯歲久湮

塞曩歲丁未里人復濬之於南北漩塢開鑿二湖一曰湮湖

一曰潮湖陳振桂為之記俱同上

候潮之法以太陰每日所躔天盤子午卯酉之位而定其消長月臨於午則為長之極歷未及申酉則極消消極復長而至於子又為長之極自是至卯而消復至於午而極盛此其大較也每月初七至初九二十二至二十四謂之敗潮魚蝦退散網罟不施初十至十二二十五至二十七謂之起潮種植醞釀醫灸忌行據順德志修

順德周寅清分纂

番禺金佑基初校

番禺史悠乾再校

番禺史悠履三校

番禺金偉基四校

廣州府志卷十三終

廣州府志卷十四

輿地略六山川

山川五

東莞縣

癸水發源縣治後壬峯山繞縣東合到涌之水流合南關之

水出北關廣東輿圖

到涌水在東莞縣東南源自道家山來方言呼港曰涌即古

所謂到港也大清一統志

到港在縣城內城外諸山之水循山東南注城東諸水一自蒟基湖經白頭柱洪山堂過洗馬橋一自望牛岡經圓通菴繞學宮前至青雲橋循城濠二水匯於東關入城至新橋餘波東至於汪屋街尾經流自新橋而西過德生橋至橫河土

地廟前與南關之水合城南諸水自金牛嶺過社稷壇自南關而入過孟山右至橫河土地廟前匯東關之水西流過市橋復折而北出北關合東北濠水西流過薦龍三駁橋迤而西南過興隆橋出印洲入東江湖汐由虎門東北上自印洲口入至興隆橋稍北入北關達於到涌其入城濠者又自北關外循城濠隨東關之水入東關復達於到涌東莞志

鼓鎮龍潭在城東二十里前有二石鎮之廣東輿圖

織女湖在縣東一百餘里湖中多支機石故名同上

虎頭潭在城東一百六十里惠州界山險絕如虎頭潭在其

下中有田據郭通志張府志參修

雙女湖在城東南七十里府縣志作城東七十里舊圖經云昔岡下有

雙女陷湖歲月綿邈每至晴霽湖中有雙鯉長丈餘或見二

女乘舟往來湖上據張府志郭通志輿地紀勝參修

龍溪在城東北溪上有洞多林木池塘之勝張府志

月溪舊名韓溪又名莫溪同上

深溪龍潭在深溪山下瀑布注之為潭人多禱雨於此水流

西北灌田甚廣郭通志

十龍潭在深溪山有一大瀑布注處輒為一潭凡十注遂成十潭初潭在谷口春水初生潭上之石掩其直瀉水皆橫飛入潭右折為第二潭水稍平石齒厯厯可數其上蒼壁平削飛溜濺空其下渚水相環如雙輪迴轉為第三第四兩潭上峯益纖峻水益湍駛溪中多有美玉色如紺青樵人以礪斤斧異香馥郁雲霧晦冥白沙朱草之間虎跡常滿此山之最深處是為第五潭上百步為第六潭左右多怪石橫抵飛湍

勢若熊羆決鬪與潭水衝激常有火光隨風四射第七第八第九潭皆然磴道峭危往往中絕涉澗蛇虺行乃得至大瀑布下大瀑布高千尺排峯直注水花成片其下為第十潭水甚黝黑是為激龍之淵天旱人投以熱鐵則大雨故曰激龍

張府志

水簾在彭崗山巔舊有大藤橫垂削壁雙瀑瀉藤而下狀若

垂簾

郭通志

紫霞泉在大嶺山之陰宋時有道人崔羽號紫霞真人遊羅浮至此擇地鑿井得之

黃通志

瀑布泉在大嶺之陽灌田二十餘里有渠長八尺餘闊二尺

澗水注焉懸瀉成瀑布十餘丈渠畔隱然有馬跡

據黃通志阮通志張

府志參修

獅子洋在縣西北一百里中瀝與番禺分界

東莞志

圓螺洋在縣西南六十餘里當角嘴岸海南柵二鄉之中

同上

鯉湖舊志在縣西南二百里查縣西南係海鯉湖無考

阮通志

合連海在缺口巡司之南水通東南大洋合深澳桑洲零丁

諸水而匯於此在城南二百六十里中有大奚山水通牂牁

江亦名合瀾海其水漩洄而黝黑三江之所匯有龍窟焉嘗

有積氣如黛或曰白霧鼓舞吹噓倏忽萬化合瀾海在縣東

南六十里烏沙沙頭二村之前與新安分界二山對峙海中

潮為水束故名中有蠓田多蜃氣靖康海市即此

據黃通志阮通志張

府志東莞志參修

龍穴洲在大海中去縣二百里當縣城南之西南上有三山石穴流泉甚甘美番船過此必汲焉有龍出沒其間故名春

波澄霽蜃氣結為樓觀城堞人物車馬之狀著舊見之對面

有合蘭洲據張府志輿地紀勝東莞志參修

木棉洋在縣南五十五里三門外東莞志

廉泉在黃嶺之麓泉出石罅闊二丈餘深尺許味甘冽宋紹興間邑宰張勳築亭登石扁曰廉泉郭通志

龍舌井在城內英烈祠下有石上向如舌泉自石下湧出味甘而美日汲不竭同上

海自新安城西而北又西經縣西南之缺口司南又北而西

經虎門二寨南而北而東至虎頭門又折而北經縣西中堂

司之西北又西北經南海番禺二縣南境濱海諸鄉則舊寨

鄉甯洲海南柵南沙武山俱在海中角嘴岸金洲小捷俱缺

口司屬麻涌到塢村俱中堂司屬東莞志

香谿羅陽溪水甚淺可筏而不可舟南漢劉鋹於增江水穿

渠達羅浮吾嘗恨其未成有袁生者嘗自東莞石龍得一小

水至羅浮舍舟八里則沖虛觀在焉然自來遊者皆由陸路

惟山中販香屑時時駕筏往來此水無名因販香屑名曰香

谿羅浮山志

新安縣

濬水在城東四十里發源於梧桐右莆隔左龍躍雙魚諸水

西流曰釗曰河北出曰大沙河二支分流至濬山合流而西

曰濬水經黃岡透迤四十餘里入後海阮通志

白鶴洲在五都海中潮長羣鶴俱集望如堆雪新安志

勒馬洲在五都一山橫出形如勒馬阮通志

蚊洲在五都四圍鹹潮繞之中有井泉甚甘同上

綠橋潭在五都龍躍頭多楠樹歲旱鄉人多禱於此新安志
流水響潭在五都發源處有數石井天造地設深約尋丈春
夏漲如飛瀑秋冬則琤琤細響

穿鼻澗在城東南三十里發源於大帽紅水諸山由錦田屏
山十餘里西北合流於穿鼻嘴南折而入沙江海

甘溪涌水由東北來逶迤數十里繞學宮縣治而南由北埠
橋入海居民戴珍築隄防之俱同上

大沙河在城東北數里發源陽臺了髻董公諸山歷新圍大
涌二十餘里至白石入後海阮通志

七娘潭在縣東北七都石蹲水中如列星石罅僅容一舟水
勢衝激舟行過此甚危蓋即歸善縣銀瓶山水也大清一統志

平洲在七都下沙村前洋海中長一二里橫亘海新安志

西鄉河在縣西十里發源於陽臺大髻婆大小茅諸山至更
鼓嶺鐵岡合流凡三十餘里經西鄉入海上同

馬鞍洲在城西西鄉村前海中張府志

茅洲河在縣西四十里發源大頭岡鳳凰巖諸處至新橋之
北十里許流經茅洲墟入合瀾海新安志

夾洲在三都茅洲墟張府志

黃莆涌在新橋村之東由大髻婆大頭岡發源而下環繞村
後直至墾下村前會新橋河合流而出新橋河由鳳凰山逶
迤而下直注永興橋會茅洲碧頭河直出合瀾海每日有兩
潮消長新橋河在新橋村西黃莆涌在新橋村之東據阮通志張府

磐石洲即帆石洲在城西海中約五十里新安志

大傘洲小傘洲大王洲平洲孖洲皆在城西海中上同

合蘭洲在三門海中與龍穴對峙多生蘭草故名大清一統志

三合水河在縣城西北源有三派其右自大髻婆中自陽臺

左自牛膝至嶺下合而為一同歸西鄉河入海張府志

碧頭河張府志在縣西北六十餘里發源陽臺太平障閣蓮

花涇諸處合流經燕村涌頭周山五十餘里至碧頭河入合

瀾海新安志

合瀾海在縣西北八十里福永司之左上同

南頭海在南頭一里海中有烏白二石對峙兩粵諸水合珠

江經虎門遶南山逶迤而東據張府志新安志參修

南頭河發源於南山至西門頭入海前河道淤塞潮汐泛溢

康熙四十一年邑令金啟貞疏濬九百餘丈水始暢流至今

賴之新安志

後海距城五里通於海東南即沙岡其水中分沙江水源二

支在南由大帽紅水山匯歸穿鼻嘴折而西東由梧桐山而

來流至白鶴洲合歸沙岡繞護縣城同上

龍穴洲在東莞縣南新安志作新安城西大海中有龍出沒其間故春

波澄霽有蜃氣結為樓觀城堞車馬人物之狀者舊見之輿地

勝紀

珊瑚洲在新安縣南一云東莞南五十里昔有人於海中捕

魚得珊瑚據寰宇記大清一統志參修

零丁洋在零丁山下近有桑洲大王洲郭通志

沙橋嘴長沙一灣千餘丈其嘴透海隨流上下潮上則灣上

潮下則灣下颶風不能埽蕩新安志

大步海在縣南百餘里中有媚珠池南漢時採珠於此方輿紀要

媚川都東莞縣南南漢置隸三千人入海採珠開寶五年廢

輿地紀勝

鐘潭在隆興寺旁昔傳廢寺佛像委潭內其鐘飛入覆之土

人善泅者往往見其鐘紐欲決水取之輒遇風而止據大清一統

志阮通志參修

獨鰲洋在城南二百里左為佛堂門右為急水門急水門在

官富山南佛堂門在鯉魚山之東又曰鐵砧門旁有巨石長

二丈餘形如鐵砧潮汐急湍風不順商舶不敢行其北曰佛

堂門其南曰南佛堂佛堂門在官富司之東為南頭出海外

關舊設哨船防守今廢佛堂門北曰北佛堂南曰南佛堂並

有天后古廟北廟創自宋有石刻碑文數行字大如碗歲久

漫滅內咸淳二年四月尚可辨廟右曰碇齒灣古有稅關今

廢基址猶存其南佛堂之山乃孤島也康熙間設礮臺以禦

海氛嘉慶庚午知縣李維榆詳請移建於九龍寨海旁據廣東

圖張府志新安志參修

長洲在急水門外大奚山南長十餘里商賈聚集於此新安志

合連海在城南百餘里中繞大奚山

屯門灣

謹案東莞舊志云杯渡山即屯門山灣當在此

擔竿洲在縣南海中張府志作在西南外洋形如擔竿外即大洋無際

番舶入海必由此離縣治約三百里

城中二井一在東門學前一在西門街中

觀音閣井在縣治右深數十丈每晨汲聲鞞鞞與轆轤相應

北門井中有巨石如太極形

桂角井在東南桂角山下泉水甘美

瓢胡石井在城東北七都平湖鄉左汲之僅容一瓢日夜不竭

九架梯井在城西門外泉水甘美隆冬不竭

沙井在縣西鄉村水甘四時汲之不竭古傳有羅隱跡

沙井甘泉在沙井村北海旁

雲林仙井在參里山側成化間布政陳選極賞其清冽

甘泉井在邑南一里許清冽異常

魚仔井在南山涌口頭每潮長則鹹水侵之常有小魚游泳其中潮退味仍清冽洵奇泉也

仙人井在城南長洲山麓泉出石上隆冬不竭甘冽異常

湯井在玉勒村水溫暖如湯能療瘡疾秋冬泉有煙氣海防

周希尹命砌以石

龍井在鵬城東山麓橫開一穴泉流不竭其水夏寒冬溫甘

美與他泉異俱同上

謹案新安志云董公山在縣東北龍井村是龍井當在縣東北也

從化縣

黎塘水張府志從化志作犁在從化縣西三里風門山下有二源一出

縣西北新開崗流經龍潭一出小坑俱三十里會於石碓又

五里至風門山下又南繞豸角嶺下入流溪大清一統志

曲江水在縣東南五里張府志作去縣五十里有三源一出中心山一

出縣東五十里之槩峒合流又一出龍門縣之藍漢山流五

十里至白茫潭又五十里與上二水合又十餘里至豸角嶺
 入流溪水皆清淺不通舟楫阮通志云曲江水即合江水也
 發源於韶槩二崗至豸角嶺與黎塘水合流至廣州城水一
 源於藍漢山至白茫潭紆折五十里與中心槩崗水會又奔
 注十餘里與流溪水合納三水匯為一涯商賈舟楫至此始
 得闊流而放泊據大清一統志阮通志從化志參修
 石榴花帶水在縣東北四十里源出石榴山下山多野石榴
 花時夾水相映故名流溪受之為巨津又四十里而奔於縣
 前之五里灘名為水口據大清一統志從化志參修
 楊州寨塘在縣東五十里明正德時所鑿廣八十餘畝從化志
 魚江塘在縣西二十五里明洪武間所鑿廣四十畝同上
 流杯池在城西北四十里百丈帶山下郭通志

沙溪在縣南五十里源出青幽山西流五十里經太平場入

流溪大清一統志

螺江水在城南五十里郝通志

觀民堂井在縣署味最清冽

大涼井在城北十八里出三子嶺下

飯甌泉在縣北二十里出西源嶺下相傳有洗甌者沒於龍

潭自此流出故名俱同上

白水塘在縣北三十里宋時所鑿計廣八十餘畝從化志

湯泉一在縣北四十里石逕溪旁一在縣東北九十里黃蠡

嶂下有硫黃氣如湯沸可熟生物阮通志

龍湫在城北三十里山下有湫禱雨輒應明順德梁儲謂此

湫可闢以溉禾捐工鋤鑿接引龍潭之水灌注城北村田數

千百畝磽瘠皆成沃壤又迤邐來環邑城濠附近之池塘得借以潤澤旱蓄潦洩從人便之稱閣老圳云據從化志張府志參修

流溪在縣南源出韶州府乳源縣流溪山流至縣前與西水合又西流至南海縣石門山入於北江在城北二百里源於紙崗十八山流繞多角嶺抵石門與清遠大溪合入於海流溪水源出五指山下潺湲數十里為黃龍砧又五十里為驚灘水中有石多觸行舟又六十里為草石逕兩岸怪石相齧水激怒濤繼是而縣十五里之井崗水附之五十里之沙溪水六十里之圍心湖水又附之眾派滢洄波瀾蕩折抱山而行四百餘里始達珠江以朝宗大海據方輿紀要郝通志從化志修

龍門縣

西林水一名九淋水自望雲嶺南抱城而東注源出鐵岡東

南流至縣西四十里與土湖水合又東至縣西五里鷓鴣石與高明水合又東南至圍頭與白沙水合又南至渴頭與路溪水合又南至蓼湖與墨湖水合又南至高湖與西溪水合又南至長灘與高沙水合又南至香溪與藍澹水合又南至犁壁與鰲溪水合又西南至龍虎灘與永清水合入增城縣界即增江之上源也據黃通志大清一統志參修

白沙水在城東五里源出虎獅山居民築陂車以灌田據廣東輿

圖張府志參修

路溪水在城東五十里源出鐵坑山可通舟楫

鰲溪水黃通志作鵞溪水在縣東南百里張府志作縣南一百里源出博羅縣

界山沿溪俱築陂灌田俱同上

溫泉一在縣西十里一在縣南六十里張府志

神仙井在縣西三十里其泉在石壁三孔流下一名飛泉井

阮通志

土湖水在縣西四十里

鐵岡水在縣西七十里源出金山逕流抵永清界可通小舟

同上

高明水在縣西北七十里源出從化縣界流溪山可通小艇

阮通志

獨石潭在縣南門外三里石峙中流下有潭蛟龍時出沒

府志

墨湖水在縣南三十里

虎跳潭在城南三十三里潭最深上有兩石相對各高丈餘

虎跡宛然

郭通志

甕泉在縣南四十里有石如甕者七大者徑二丈小者徑一

丈上有泉水自石面湧出以入於甕而潛流為溪其性甚烈

大清一統志

高沙水在縣南六十里源出甕泉可通竹木筏

藍澹水在縣南七十里源出黃沙崗居民築陂灌田

張府志

永清水在縣南百里源出藍澹山可通舟楫

岳潭在東埔何村之界

屬開源鄉

澄淨清碧有石如鼓俗名岳鼓

熱水潭在鷓鴣石上隆冬水暖可浴

大魚潭傳有大魚漁人捕之忽化而去故名

新甯縣

上三都之水大都盡歸北下三都之水大都盡歸南歸北之水約分五派中派為縣城水潮境三合筋坑之水入焉西北一派為白沙水又一派為羅沖水東北一派為沙涌水又一派為白廟河歸南之水分三派中派為廣海城水上澤沖之水入焉西南為那扶水東南為潭濬此其大較也新甯志潭濬河在縣東南八十里即都斛河首尾與海相通縣東南派之水也邑諸山脈從此度焉

蘇渡河在縣東北四十里相傳東坡訪鐘鼎過金溪渡此故名

瓦窰灣河在縣東北上接蘇渡新甯新會分界山上有營汛在焉縣東北派水也

王步頭河在縣西舟楫灣泊之所俱同上

雷潭在縣西一里新甯志作三里源出百峯山雷常興於此故名一名雷公潭相傳有龍興於此據廣東輿圖新甯志參修

紫霞河在城西十里發源百峯山順流至龍頭河又二十餘里與開平之長沙河合一名紫霞海據大清一統志阮通志廣東輿圖新甯志參修

白廟河在縣西新甯志作縣北接源龍頭河發源了髻山北流至長沙據大清一統志阮通志新甯志參修

法竹河在縣西相傳有異人晚至無舟以竹為渡故名新甯志潮境河在縣西四十里發源上陳諸山北流至潮境同上

湯湖在玉懷峯之下四時如湯一名溫泉在縣西南二十里冬月氣騰三四丈嗅之有硫磺氣據阮通志新甯志參修

西江涌在縣西南三十里于役冲葦廣海者或溯焉明成化

初新會縣丞陶魯因其流小由魚塘至黃塘開鑿二十餘里通甘村以入廣海今遺址存焉新甯志

那扶河在縣西南一百二十里下通陡門陡門海中有鬼子洲望之白石稜稜其上游名獅子洲兩旁有石浪觸之如鑼鼓聲相傳有戲春色者載舞具過之見二洲隨波蕩搖有對舞狀乃擊鑼鼓助之俄頃風濤四起墨霧霾天舟中之獅頭魁面翻然皆動舟溺中流而舞聲不竭今人相戒渡者毋聲鑼鼓云

官涌濬在縣西南一百四十里東出雙洲口西出官涌口雍正十二年附近居民疏濬約十餘里邑西南派之水也俱同上

寨門海在城西南二百里番舶往來之衝上接那扶陡門下達大洋據黃通志阮通志新甯志參修

大澳海在縣西南二百餘里新甯陽江分界新甯志那西河在縣西北十里潮迴深聚官舫商舶多艤於此同上

南門河在縣南發源石板潭一名大人橋道光二年知縣江涵墩倡建豐和橋遶西而流環邑城如帶據阮通志新甯志參修

泥涌河在城南三十里發源百峯山由冲菓墟順流三十里至廣海烽火角入於海據廣東輿圖阮通志新甯志參修

矧筒水源於大隆山在縣南四十里又南為上閣渡有那馬潭在焉又南入廣海南方中派之水也據黃通志大清一統志阮通志參修

半塘水在縣南四十里源出縣西北馮村坑南流入海水大而深險一名半塘海大清一統志

亞洲海在縣南四十五里同上銅鼓海在縣南二百里逕銅鼓山眾水合焉風濤觸石如銅

鼓聲石出海中怒濤時發據方輿紀要新甯志參修

大牌海在下川山之南其中多蝦多蟮白多赤魚即南門洋

在廣海寨南一里汪洋浩瀚據張府志郭通志參修

東門洋在廣海寨東一里大慶門洋在廣海寨東鹿脰洋在

廣海寨東南番舶往來經此張府志

大水坑在寨西發源龍口石六七里達於海上同

北門灣在廣海寨北一里新甯志

大金門海在上川山之左流接銅鼓海廣東輿圖

小金門海在上川山之右諸夷入貢遇逆風由此進

醴泉在海晏都那扶堡俱同上

增城縣 增城縣有增江在城東一里源出龍門縣鐵岡高明二崗經

白沙南下入縣界三江口合楊梅澄溪二水經縣東抱城而

南穿南山多嶺之口折而南至新溪分二派一支西折流二

十里曰散塘洲又三四里經石灘派分而東南繞碧江邨曰

碧江又南至黃埔入東江一支自新溪下曰牛潭水又東南

繞紅花地出口入東江亦曰相江以崔與之作相得名穿南

山多嶺而出西南經石灘過鰲潭埔與東江合發源鐵岡高

明諸洞經龍門由龍潭埔南下過城東漸折而南至石灘口

與東江合流而西據通典大清一統志阮通志張府志增城志明史地理志參修

曲水池在縣東隔江五里巖竇湧泉流於盤石旋環九折可

以泛觴二石壁立下有石堰廣十餘丈據廣東輿圖阮通志大清一統志參修

別情洲在縣東南江水之中小洲四面懸絕故老相傳於此

洲上敘別因此為名一云在縣南二十里增江下流今名雁

塔洲據寰宇記增
志參修

謹案新修縣志失載據阮通志補入

大娘湖在城東南三十里春漲冬涸張府志

牛潭在縣東北二十里上接新溪東派遠紅花地出江口入

於東江據元和郡縣圖
志張府志參修

九曲水在縣東北二十五里源出欖溪其流屈曲兩旁桔槔

引水灌田千畝環繞而西至大步口入於增江水在金牛都

一云在邑治東北六十里發源馬鼻嶺舊志發源欖溪誤據

大清一統志張府
志增城志參修

羅陽水在邑治東北六十里發源羅浮山由酥醪洞西入增

城迤邐數十里轉入博羅循魚跳石過歐陽嶺至增南龍地

入於東江羅浮瀑布併而成溪者一判自分水一均東曰碧

溪西曰羅陽見圖經注增城志

新溪水上接增江十五里至新溪村前分三派一云在邑治

南二十里即增江水由新溪村前分派過牛潭經三江墟至

龍地入於東江據張府志增
城志參修

石灘水上接新溪南派十五里至得子嶺遠仙塘洲至石灘

稍東一支遠碧江過杜岡出江口碧江水邑治南四十里亦

增江水至石灘由碧江分派繞杜岡村側併於東江同上

百花林水在縣治西八里增城志作
十五里其源出縣之西北境流

至蔣村坑過雙鯉橋趨豸嶺入於增江據大清一統志張
府志阮通志增城志

風湖水在城西二十里張府志

龍泉在縣西青山有神龍帶銅環上此水有穢此水則便澍

雨黃通志云縣西二十里有龜淵俗呼鼉泉考唐時已稱鼉泉俗呼為龜淵耳據元和志阮通志參修

天塘水在城西七十里滌洞灌田故名張府志

綏福水在縣西源出綏福都河徑諸山又在城西北合綏雲二都之水為溪故又名雲丹水源自河徑諸山出埔尾墟經

茅田過陳江遶沙濬及白岡一支由温涌神山過大墩入海一支自石頭老鴉山合鯉潭入於增江在邑治五十里一由

上番禺發源一由青幽山發源至坑貝墟合流經神岡墟過仙村墟至十字濬匯入東江據張府志增城志參修

澄溪水在邑治西北六十里發源澄溪水至三江口注於增江增城志

防水縣南十五里曰流防山其下防水出焉黃通志

東江在城南五十里由惠州而來明史地理志增城縣東有增江南有東江但今縣境至東江之濱而止其江面全屬東莞張府志

十字濬在城南五十五里東江合增江西注綏福水之支流南注分二派徑趨虎門形如十字故名張府志

三水廣州三水記云白塔水庾水胥水三水上源源出龍川經增城而流入海寰宇記

東西洲在城南甘泉都山泉之南注者過沙村分為二派浦激滌洞並通潮汐東曰東洲西曰西洲張府志

塘江水源出流坑山下闊一百二十九丈在縣界寰宇記廟潭在城北源出靈山東流至三江口入江城北四十里崇

賢都派潭之所經也山上有廟水至此滌洞數折而潭成焉

稍南則澄溪水西來注之

據大清一統志張府志參修

派潭在城北七十里楊梅村通都異派之水匯而成潭其北則牛牯嶂白沙灘呈臺獅石諸山水合為一派石龍頭山口又有車同水東來注之西北為鳳嶺等處諸小水入於鷓鴣之白泡水經蓮塘逕合流而南又三十里合澄溪水而入於增江故其地名三江口

同上

鹽坑水在楊梅都鳳凰嶺下其鄉亦名鹽坑村

張府志

熱水湖在楊梅都約百丈春冬常熱

同上

香山縣

赤水流在太平村左石磴峻嶒飛水歷其間如白虹盤曲飛騰上下久坐者神為之搖矣都人士時登高於此

香山志

水潦槽在黃梁都山背陽能備旱潦

大板橋水在黃楊山下由石門坑橋經龍歸橋至風流橋出斗門涌凡十三里

大深坑水合古井坑鶴兜碓石腦諸山水至乾霧出灣口凡二十里

俱同上

沙橋在谷都東三十里過逕山嶺甚峻曰退田嶺嶺間阪道十二曰沙橋自上視下其深不測嶺高百餘丈中通一徑嶺南每深山窮谷中通一路謂之徑上為平逕頂距石鼓碓十三里在縣南五十里為南北往來孔道良都谷都分界處上有雲逕寺茶亭平徑汎萬松陂

據阮通志香山志參修

龍井在縣西南八十里谷字都山上天然石磴也深約二丈闊二丈餘雨盛則垂水天晴則懸瀑在稜角山下懸瀑中有石如魚距平嵐鄉五里由了髻發源涌溜數峯則陡折石勢

自成溪瀨中有孔穴水色清澈當日午俯視池底有長虹橫
臥湛湛搖漾彩現五色其南出乘崖觸石成井水深不測素
波白激喧聲雷震井中突起怪石高三四丈峭立以蓄其勢
下則驀歷萬山流注遠矣鄉人祈雨立應據黃通志香山志參修

石水井在烏石村圓山下泉由石罅仄出不流味頗甘冽一

云冷池在大芒山下舊志已涸洪武以來源泉復出清澈甘

冽呼為石井云云今大芒山並無呼為石井者耆舊相傳皆

云在烏石村圓山下大芒山與烏石村相望偶失考耳香山志

熱池在雍陌村前三里原田淤洳中廣可四丈許深窪莫測

四時煙起如蒸冬寒愈燠與冷池相距六里許故統名曰冷

熱池好事者以絲繫巨蠅投其中少頃出之螫跪盡赤若烹

炙然楊節熱池記

謹案香山志云雍陌在縣南八十里而熱池記云香

山去城三十里又云在雞拍村皆誤且雞拍村在縣

東南九十六里亦不止三十里章易詩云一池分冷

暖蓋括二池言之

門限嶺溪水中從塘墩坑南折烏鴉口西過孔樹兜又南出

前壠右則從東逕南折嶺背西歷馬鞭埔過榕樹埔又南過

南望陂雍陌鄉建甯橋東過東山書院南過東圍至熱池左

則從竹林埔南過銅鼓地東折出缺困至高橋南過水截頭

皆會於茅灣入孖洲海香山志

平山湖泉流所發會出大嶺東八里過平嵐鄉

將軍嶺澗水東流八里過烏石橋頭鄉出細墟橋會平嵐鄉

之水流注三合港折東至茅灣又會雍陌大市前壟諸水過

外埔前至孖洲入於海共二十餘里

金斗灣在恭常谷字都界水頗闊海物錯出故名

銀涌在谷字都有石如龜每潮生石上浪白如銀因名

翰香泉在縣西南八十里陳公石之左

百峒溪在鳳凰山東百峒飛瀑而來中有石高砥眾流上鑄

百峒溪三字

蘆花水在大仙嶺東石筍高出五六尺噴溢如蘆花又東為

綠潭恆見神女出沒大旱致禱神女見則雨至

飛雲嶺左澗水厯牛淶坑北山坑會金鼎山同出上柵官涌

橋入於東海其右澗水厯雙龍西山那洲牛欄坑會同村出

水澈橋過茅灣入孖洲海

山寨逕左澗水過大小赤山大小南山至東岸村出大閘橋

入東海

鳳凰山左澗水過神前逕山崖鷹鑽山龍潭坑出雞拍村涌

口橋入南海其右澗水過東坑鐵帽山鐵鈴嶺會南大涌村

前出坦洲海其中支澗水過香山場合外神前村乾涌南村

新村出升斗石入東海

翠微溪過大慙山牛鐵嶺上涌匯會鵝槽山出蜘蛛洲海

峽口瀝在南屏村西八里將軍山峙其東鸚管山峙其西北

接鵝槽坦洲孖洲蜘蛛洲諸港之水南達外洋長十里許兩壁

峭石水急如箭而渦潭旋轉滌洄如螺紋焉風雨將作則雲

霧昏冥海豚跳躍嘶風吸浪黑黃蒼赤出沒波濤險怪萬狀

以諸山為外障故內則谿谷叢雜此為要隘也

石牛潭在下柵村前有巨石肖牛若渡水狀其形半沒潭中

半浮潭上

澳山泉曰大龍喉泉曰二龍喉泉曰小龍喉泉俱在東望洋寺右曰山水園泉在西望洋寺下皆水自石出清冽甘美紅黑海在澳門關閘側其沙隄長十里廣五六丈隄之西則水色清碧隄之東則浪湧紅黃故俗有此名也而關閘以南其沙隄之色微黑又與關以內沙色截然判分俱同上

十字門水東自東莞虎頭門經黃角東洲門涌口門金星門九星洲零丁山濠鏡澳來西由海洲古鎮經三門口南野角

大小橫琴合濠鏡澳出十字門廣東輿圖

涌口門海所屆濛遠在縣東七十五里上有礮臺北十里為東洲門南三十里為金星門其外山痕如螺黛點染於煙浪中者為淇澳山距涌口門東南二十五里又東皆大海與東

莞新安相接約七十餘里東洲金星皆西近岸故泛海者率由兩門上下沿岸而行其往來寄碇停泊之處若雞頭角泮沙環后沙環過流環並有市肆瀕海諸村有海埠康熙時巡撫法海為海孺少田給與附近居民任其採捕以資生計潮自東南來故涌口門潮汐較縣治常早五六刻涌口門裏之海四大兩都北四字都南大字都中徑八里田畛相望海潮灌漑上接眾溪之流委輸出涌口門實四大兩都水道咽喉也香山志小隱港在三洲口海潮自東過小隱村北通大環過渡處有天后龍王廟江尾頭西了東了神涌諸村之水又宮花水從五桂北出合諸山水成大溪經神涌前與港屬井頭山左峽水過東了過大環白石馬左澗水過小隱合注於港近港口立水柵三上築礮臺旁立天后廟距水柵三十餘丈出港而東有下茄

涌 四巖山後澗水注之 潆角涌 山下有山州坑廟小土屏 平萌涌

西出黎村注之 榕樹涌 即榕樹環有平浪廟土屏

四巖山前澗水從象地左 筆架環 大尖峯澗水自東 其水俱北入海又東為東洲門

之 澗水自西來經南邊塘之北右繞南塘左與溪合入涌口門

石盤溪從四巖山下東出南過基盤石西過濠涌村煙筒山

澗水自西來經南邊塘之北右繞南塘左與溪合入涌口門

三度溪從八簾嶂東出北流而西過營地埔雙石橋稍北

嶂北一為馬踢水一為白石坑水俱自南來注 為三度溪北至神涌前會宮花水出

小隱港

土屏山右澗水東北出麻子村長沙環入海

出水象山澗水東經麻子村左入竹洲

四巖山前澗水東過麻子村下灣山入李屋邊岐頭海

合水口溪從較剪門東至田螺坑劍門坑水自東北來與之

合又東過溪底震竹山澗水爛泥逕澗水西南流與橫逕左

澗水合而北與之會為三合水東出過笄環至合水口村

前雲梯山寶鴨池水自南來注折而北過黃道山前至沙岡

嘴東至九度橋五度橋東出涌口門入海

白企溪從破鑊逕東注過白企至下灣石板橋過大畧頭東

行折北會合水口溪 俱同上

龍頭墟溪從分流水東注過貝頭裏三山虎東過龍頭墟確

坑水自北來過大車村右井頭山澗水自西來過湖頭山至

大車村前合流出貝利港南注溪東至沙岡場白石馬山澗

水自西北來過赤坎環出後萌坑西過大車注於溪其東過

西江美者注沙岡嘴又東至沙岡嘴與合水口溪會匯

據香山志

宋訪冊參修

石門溪從五桂山東南而出東過龍舟地西簾逕右澗水自北來注又東過員岡前紅旗嶺左澗水為獐鹿坑自南來注又東過石門村震竹山澗水為牛路坑自北來注又東折而北爛泥逕水自西北來過福鑊山後至新住山左與之合又東南至山門竹頭園東過下山亦名下山溪東至崖門山入海雲頭溪從橫逕東出壠坑陂小雲梯右澗水自北注之又東過平山崖口南過隔田左出崖門山與石門溪合大望山南澗水過平山汛至溪尾合流出崖門入海中多滲漉雨則溢否則涸水栢樹溪從黎坑右出小雲梯山左澗水注之東注企溝折南西坑之水南出泮沙與之合過水栢樹橋又過隔田村南

會匯雲頭溪

南萌墟水從黎坑左出至亨美村西坑水西出沁頭下灣與之合北折而西過墟頭橋安定茶橋東北至大望頭入涌口門

龍穴頭水從大望山北出折東至龍穴頭王家車水自西來

注過左步頭北出石橋至白鶴墜入涌口門俱同上

宮花水在縣東二十里香山志作三十為五桂長江山眾水所匯阮

志張府志但言出長江山云翠澱綠波瀾漫旋折板橋數處復設小舟以

備旱潦灌溉得時一都之田歲無旱患據張府志香山志參修

金紫泉在縣東十五里阮通志張府志作十里相去巖溜百餘武香山志

金竹泉在縣東十五里阮通志張府志作十里較金紫泉差洌

紫馬泉在縣東十五里阮通志張府志作十里出紫馬嶺下因名

金蝦泉在縣東十里五馬峯麓中有金色蝦故名

湧泉在獅狗埔田塍下泉出處皆浮沙或以沙覆其上水湫溢不渾不竭

三元泉在石岐山下三元觀內隱泉寺眾香亭側

流水坑在縣東三里東為仰螺山西南萬年陰流水清澈固寒不涸

石溪有水如瀑布在縣西南四十里一作縣東一百五十里土人名曰

水門水貫流萬山中迅駛如瀧

深灣涌其水一自分花水均自北而南至鹿鳴嶺前一自白

坭坑村會諸峽水自東而西至鹿鳴嶺前合流為白坭坑一

自長沙埔會諸峽水迤西至白泛州一自黃茅岡會諸峽水

由北而南至白泛州合流西出會白坭坑涌出海

白銀水即馬屯山在縣西南五十里張府志作城溪旁有銀

樹西北合梅花水入於海上俱同

梅花水在壽星塘山之下在縣西南三十五里香山志作由

鴻鶴嶺西流數里出梅花村故名合烏巖香爐白銀等水西

注橫坑入北臺海眾壑所湊匯而成溪俠流浩漾冒石而過

波往仍迴勢皆倒注千百折無一直瀉者沿溪皆喬木叢竹

雜英芳卉紛綴如錦湍急處往往有磐石阻激中流可趺坐

而聽泉也其溪有小舟農父渡溪耕深山中鼓楫石間與水

旋折若三瀧之險矣其中有巖洞鱗介生焉舉網所得鮮美

異於江湖西折三里至石鼓碓之南白沙瀰瀰狀如凝雪又

納牛耙石飯包石香爐峯諸水出石橋而西又匯大尖山壽

星塘花樹坑戴土嶺諸水而過北臺山之南出龍眼樹涌注

廣州府志卷十四

於海據郭通志阮通志張府志香山志參修

翰墨泉在壽星塘山下石浮陂陀上無溶滄而泉出漱之有

翰墨香遺名舊傳斯亦山谷含靈之異也香山志

六十陂自梅花水南來在南臺之北戴土嶺之南據張府志香山志參修

橫坑水張府志作橫江在南臺下張府志作縣南五十里為梅花諸水總流香山志

分流海在港口上流東注於東洲門北注於廣自港口汛北

至橫逕汛十里又北為浮虛海東出東海西接畧步汛皆屬

鋪錦海即分流海據阮通志張府志香山志參修

港口在石岐上流水小而淺潮平可濟汐涸則難縣北之咽

喉也明正德閒為寄莊豪右所築今通之自上閘汛北至港

口十二里自港口而南為澗濠口又南為張溪口上閘汛及

俱在東岸又南為員山仔涌口西為獅澹口皆屬於港口海香山志

自上閘汛至下閘汛六里上閘之南為青雲橋涌口又南為

元壇橋涌口下閘汛在其西皆屬石岐海

自下閘至第一角汛十五里下閘之南西為西河口東為白

石涌口其水一自橋仔頭一自天王橋合流出涌口入海又

南為槎橋落涌口又南為威遠小堡對海為威遠整臺又南

為荔枝基涌口又南為渡頭涌口水從黃蜂坑峽出涌入海

其沙涌整臺文閣皆在其上皆屬下閘海又南為第一角汛

俱同上

第一角海在縣南海門淺隘南抵大洋乃縣南鄙之咽喉也

明初都指揮花茂防寇於此民呼曰花夫人馬頭距北臺汛

十里中為北臺溪口汛在北臺村前自北臺南至深灣汛十

里中為深灣涌口汛在深灣村中其西即芙蓉沙中為橫

河口達新會界其南即蠓殼頭海海道四達

據黃通志香山志參修

獅澹在上閘之西自東而西繞長洲鄉北北接猛水涌

香山志

西河涌在下閘之南自南而北出西河橋北過倒瀝涌口又

北過橫澹口又北入獅澹接猛水涌口自橫澹口及倒瀝涌

之西與猛水涌之北俱接象角大海長洲鄉人在橫澹倒瀝

之間築礮臺焉

澗濠在上閘北五里由西而東為三澹口張溪水注之又東

為犁頭嘴岐頭水注之礮臺在其上又東為東濠口羊角涌

注之出東濠

張溪涌本作張多澳發源蓮峯北峽由大陂村池西過厚興街魚

步至基邊村前分流一會三澹口出東海一經張溪村前出

西海

圓山涌在上閘之南其水自圓山村前出圓山橋一西會青

雲涌一池西出涌口入海

青雲涌其源一自插笏山前長畧由北而南折西過誕嘉壑

西北至青雲橋一自圓山村前由西而南一自紫里水松基

由南而北又西過界木廠為後岡涌又西過甲子橋折北而

西合眾水南過步雲里出青雲橋入海

雙合山北峽之水至三角塘村前為羅婆陂西折至虎涌

或作

庫村前桂峯小嶺諸峽之水來會至蜆涌減水缺分流其一

池北九曲入清風橋繞 文廟而西過元興街為東濠會東

關水又西過南門橋為南濠會南關水出登瀛橋其一池南

折西過橋仔頭又折北為西邊涌東北至登瀛橋合流過梅基為沙角為灣底總名南河出元壇橋涌入海

荔枝基涌其水一自北臺山北峽發源而長環西山二山北岐之水自西注之又下馬嶺葫蘆棚上塘之水自東注之迤北而東過沙涌恆美村轉西出涌一自石頭山發源迤南而西出涌合眾水入海

放生池在縣治右仁厚街西長一百步元祝聖放生處俱同上

謹案舊香山志云自嘉靖二十一年丁未修志歷今

康熙十二年癸丑相去一百二十七年池入民間已

不可考又云今何氏梅圃有池耆舊以為即其故址

大井在縣治西北仁厚街一云在龍眼都濠免村四面澄澈

歲旱可溉田據張府志香山志參修

義濟井在城西六十步宋貢士鄭度穿

萬年井在蓮峯麓今涸

冬滿井在義祠後石山下夏平冬滿因名俱同上

溥惠井在縣東北了村集真堂前舊志集福去縣東二里香山志

滿水井在縣東七里佛仔屋下泉湧不息味清美案佛仔屋地名有三

一在隆都一在沙涌而北在土瓜嶺牛起灣之西北

沙井在西門內武山下其泉白石出甘美可愛

白水井在縣南半里地名沙岡頭其井最古鄉人共汲舊志

云黎家巷即此處

長命井在縣東小北了村三里採訪冊仁壽井在崇義祠內居民飲此多壽云

漢水井在北山村

潘家井在縣龍眼都潘家村深尺許底有沙如珍珠泉水上湧清冷逼人其流可溉田五六頃入於海

孕雲泉在圓峯之麓味甚甘冽異於常派

五眼井在谷字都茅灣村下冬暖夏寒與溫泉相對

天井湖在恭常都下柵村一在官塘南之湖仔峽自南山竹門瀉出深

二丈井水清澈峭壁飛流浮險四注貫於湖中天然若井靜

深不窮峽上有仙人跟跡數處鄉人以石為壇歲旱取湖水

至旱福場用水牛然火四旁迫之牛觸場中地損水動祈雨

立應俱同上

石泉在金紫岡下寒冽不竭阮通志

黃婆泉在城南二里水清冽鬪茶家汲此同上

象乳泉在城南十里飛鵝山北僧慧融掬之而甘因闢焉阮據

通志張府志參修

丹泉在城南八十五里出五桂攀天嶺之右巖其味最香冽

同上

神井舊名牛王公井在龍都山谿角雲漢堡鳳山之陰色清

潔味甘而香道光乙酉有不潔婦過而濯之遂泥不食越旬

餘忽從旁湧出一穴其泉香美與舊同居人嘉其所養不窮

且喜其能自潔也護以石欄香山志

石岐海在縣西北上流自港口接分流海南流為第一角海

抵大洋海中多州潭種蘆積泥成田據大清一統志黃通志阮通志張府志香山

志參修

象角頭海在縣西十四里阮通志作二十里西接鱗鯉瀝北通大欖

東南通第一角海其勢汪洋風起浪湧舟不可艤晴則水光

接天往來晏然今成潭田港海漸窄矣源自鋪錦海來流至竹仔林木洲虎跳門厓門牛角山通新甯廣海衛三百里據

大清一統志阮通志郝通志張府志香山志參修

疊石海在縣西三十里香山志作二十六里中多魚蟹之利旁有巨巖

鄉人置蟹斫魚筒採捕鮮物自順德縣匯三槽海流至香山

據大清一統志阮通志方輿紀要香山志張府志參修

甲洲海在濠涌村下海中有二石一曰牛石一曰寶鴨石上

下相距二十餘丈下有窟土人云水怪居焉漁人不敢近嘉

慶已已海寇為患恃此二石蟠踞中流大船不能深入實為

邑城水路險要香山志

烏沙海在三竈東張府志

鱒鯉瀝曹溪水鷺海水在古鎮曹步海洲香山志

二埗海在小欖北其西北為石排海為漚頭海又名村心瀆

又西北為橫流海沙瀆水在小欖西與順德分界北通石排

海西通螺沙海寨前海在小欖西

較翦口橫海在小欖東其東南為流板海

戩角海在小欖南其西南為橫琴海並同上

梅花泉在大欖落霞峯之陰伍鐵山在榛莽中得之味如梅

花芳馥寒冽據香山志何吾騶元氣堂集參修

開元泉去梅花泉一里水僅盈尺汲之不竭始闢於伍有開

傅元子故名同上

浮虛海在縣北七十里亦曰橫江在分流上流泮泮滔天號

為巨浸自新會縣江門分流東出經大黃圃小黃圃曰倒流

海又東南經浮虛山曰浮虛海又東曰分流海至東洲門入

大海倒流海在浮虛之上其中巨嶺激水湍急迴流深險據

大清一統志阮通志
張府志香山志參修

鱣鱣海在縣西九十里自新會縣江門分流南出又南入海

大清一統志

井沂水在潭洲南畔山水色晶瑩味甘冽中有銀蝦香山志

坵海在大黃圃村南五里澎湃浩瀚中有蜜糖池相傳舊有

大蚌在此吐吸珠光味如蜜若虞淵之甜溪也同上

小黃圃海眾水輻輳南北要衝舊置巡檢司民稍安堵今宜

專哨鎮守以握其衝據張府志香山志參修

大龍潭在庫涌後山頂有飛瀑阮通志

天狗尾海在大黃圃之北東注潭洲西達高殼頭香山志

獨子洋東南達橫門東北達蕉門西南達縣城導納眾流蕩

蕩淹浸同上

新會縣

天河海一名羚海在城東北八十里張府志作城東四十六里其水源自

廣西大江來至肇慶而下直至新會其思賢濬乃此水支流

合南雄水以達於省城其正流經順德甘竹至銀瓶嘴又西

南行經三瀝沙至天河下橫江其自銀瓶嘴至白藤左為順

德右為新會直注豬頭山海中有草鞋洲與波上下巨浸不

沒據張府志新會志參修

外海在縣東三十里其水自北街口來合諸水東通香山北

通順德南通厓門同上

文溪在城東源出綠護圭峯諸山西經黃雲山自北關入城

繞泮官趨東南水關東趨騎虎關由縣濬達於海其支流一

在義濟橋上左入關帝廟前一在橋下右入橫涌通爵芳巷
後又南至牛皮寨據廣東輿圖阮通志
張府志新會志參修

江門在城東北十五里肄水南注於鬱水東至番禺西分流
至縣東為江門江門受鬱水肄水委流分而為二左逕石嘴

至虎頭門入於海右逕縣澗入於熊海據黃通志阮通志張
府志新會志參修

橫江在城東北六十里中樂都張府志

鱷洲海縣東南六十里曰鱷洲山其下有鱷魚海

熊海在縣南二十餘里東通江西通青膽洋南阻厓山熊子
山下皆曰熊海東經香山縣為少梁海西逕蜆岡自北而東

至厓山為厓門海據大清一統志
方輿紀要參修

厓門海在城南百里外連香山新甯海面直達烏豬大洋張
府志

甜水在厓門三嘉村坑水較他處獨甜宋帝昺時嘗進御新
會志

聖潭綠護屏南有潭謂之聖潭方輿
紀要

葫蘆橋水在城西五里發源蚪蛇出小梅入鯿魚海新會
志

美成橋水在城西六里發源勒籬頭東南入鯿魚海同

紫水在縣西五里張府志
作三里源出龍山遠萬壽寺過分水岡出

妙宗橋入熊海宋皇祐間水色偶變而為紫人以為瑞故名
據大清一統志黃通志阮
通志張府志新會志參修

鑼鼓潭在縣西四十里山溪之水匯流經此水石衝激聲如
鑼鼓南流入海方輿
紀要

石巖瀑布縣西四十里曰金岡山又西有石巖瀑布巖深二
丈餘廣如之巖頂飛瀑其白如練黃通
志

青瞻洋在城西六十里新會志作三十里受恩平開平新甯諸溪澗

出蜆岡沿於長沙西合曹幕梁金山諸水經潯陽至牛肚灣

迎潮汐以匯於厓門汪洋百餘里其厓有青瞻石又十里至

沙岡其南下為雞籠岡水為亞鵲海合流出三八海口經岡

背村外出銀洲湖據張府志新會志參修

潭江水在縣西五十里新會開平交界發源鶴山縣崑崙諸

山經新鶴交界鑼鼓潭由鶴山趾山凌村經石步至開平潭

江注新會田邊村出海口南下青瞻洋新會志

天臺硬溪水在城西南二十里新會志作十五里即古義甯縣之帶

水其水西由馬尾山遶茂山東注出大涌口南折入海後因

海寇由大涌入乃築塞大涌口濬牛濠小水挽流而上北環

石牌以入海據張府志新會志參修

九曲水在縣西南三十里潭岡村南西南流經梁家村出瀧

水口新會志

鴉鵲水在縣西南三十里橫岡蘆霞嶺背潭岡之間發源平

埂諸山經天湖葫塘尾坑出橫岡由羅坑石渠平步出與水

邊澆水合

亞鵲海在北洋村南七堡村北西接青瞻洋案亞鵲海有二

異地同名七堡有渡名亞鵲渡

中樂都水凡三派南曰桐水北曰濇水中曰川水而眾流所

歸統會於尖龍尾桐水一出磨耳均繞出大凹村之後一自

小逕繞大凹村之前與大逕水合下岑村兼井溪公坑之分

流而匯於桐村折而至松葫羅岡以出冲黎海與川水合至

南山與公坑水合趨蟾蜍石丹竈諸水來會之濇水發源鶴

山之霞洞百折而至濫村川直抵圓珠岡之左以入新會西
北接赤嶺頭諸水迤邐紆回而抵北坎良溪匯於圓珠江之
右合流出藤澤橋尋挾天河橫江周郡迤北一帶行潦同出
大林澗口其支入沙富澗出烏茭洛與金竹岡兩閘水會於
石瀨自是川水之勢始大川水一名濠步海發棠下繞茶岡
別出九曲澗而正流歸濟川匯源兩橋兼文閣之桐涌出棠
下總閘併石瀨及明竇之大姑涌入冲黎海與桐水合其支
繞蔡邊澗出五福接龍兩橋與澗水合趨石鼓觜三派既合
自尖龍尾至篁村分而為二一自白石海海口以趨江門此
經流也一出濠澗以達大江
大悅澗水潮長從關外入城至古榕臺潮退各循故道而出
五顯關水潮長一派西從沿澗口經城外河而至一派南從

深籥禮樂而至同匯於此以達江門

清化關水潮長從關外入城至古榕臺

荷塘水北自豬頭山來至白藤分而為二西南經濠澗北街

入江門復分流入外海迤東趨荷塘潮連達於外海俱同上

瀑泉城北二里曰桂山多松竹藥草是謂黃雲瀑泉出焉黃通

志

天等水源自起蛟嶺萬山中來經天等諸鄉過天等橋又十

餘里曲折回環出天等海口南合青膽洋新會志

潮退水源鶴山崑崙諸山過潮透橋南下橋亭經北洋入亞

鵲海

大澤水發源豬肝山西經將軍山後三交峯前出大澤墟又

繞騰龍里入海約三十餘里

響水橋水發源合掌簪簪尖過將軍山前出響水橋經小澤
灣村長灣村入亞鵲海

橋亭水發源鶴山雞仔地西會南洞村諸水至李村前名鉗
頸匯為一南行數十里入新會界游魚汛北又會石帽尖前
後峽之水共出橋亭前繞村而南周姓各村俱沿水而居又
東環北洋村後牛口勒村前入海自發源至入海百餘里
老女橋水西北發源於鶴山經合洞三水迤南至大范墩又
數曲至馬冲東二十里至黃魚濬入鰲魚海
潭溪在潭岡村前其西南注九曲水東北過水邊漚水經大
灣小汾龜岡冲茶四九諸鄉合三八水出橫海東達鰲魚海
深水湖廣袤里許挾長坑水東經坑頭村山谷泉自東坑出
注之其流始大復東行北轉達於水東入於海

沙富水由歪髻山自西而南經南坑塔嶺沙萌岡諸村復迤
東至見龍橋達沙口入海

凌冲水自燕子尖出由西而東匯諸坑水經步天通濟二橋
復迤南繞龍灣出寺前橋數曲至水口墟北出白鶴洲嘴入
海俱同上

湯湖在城西南一百十里迤逕長溪中流一帶其熱如湯上
下之流皆冷廣東輿圖

封水在信安縣東六十里源出靈粟山北南中土風唯稻無
粟此山種粟即成寰宇記

謹案阮通志云宋太平興國改義甯為信安後併入
新會此水今查各志俱未載亦無靈粟山之名附記
於此以俟考

惠泉井在惠民門外舊志稱譚家井邑人譚聖裕鑿清而不
冽為邑城第一泉新會志

鍊丹井在邑城長生殿廟前水泉甘美宜造酒

瓦窰井在西門外源清坊泉清而味甘

北上廟井在源清坊陶魯鑿

石井在源清坊邑人謝景佐鑿

繞水井在西門外瑤步冲邊潮長出其上水甘冽以杓挹取

煮豆腐重於他處

蓮花井在花橋亭元至正間邑人林濟鑿

大井頭舊名細細恐西之誤在象山下金牛廟側泉自湧出邑人

何稅成贊之

鐘樓山井在縣治東邑人林厚鑿

銅鼓井在馬山下汲之有聲如銅鼓

江灣井在東關外石山下味次惠泉云

龍泉井在油步涌

烈婦井在河村鶴邊村泰康里蕭積善妻死節於此新會志

云雙義井蕭積善及妻何氏死節於此考蕭為盜殺何氏乃

死於此井志云蕭及何同死於此故以雙義名似誤今更名

烈婦從其實也

紫衣井在仙湧寺後山之麓上有流泉出石竅中竅形如鏡

深廣三尺許錡錡不絕相傳水面恆若有紫衣覆之有紫衣

僧鍊丹於此丹飛井中遂成紫衣云

牛蹄井在仙湧寺前半里塘尾村

田頭井在程村田畔俱同上

神仙井在城西十餘里兩大山側澗水流疊石閒匯為池大小不一皆有高下層次中生天然石枕巖在隙中一水直注枕內夏寒冬暖枕旁有掌蹟二相傳白玉蟾過此踞地飲水頭頰手案入石痕不滅井之上山半平處為馬臍塘塘方廣畝許宛如人力贅築常有積水惟產馬臍魚亦可異也據大清

一統志阮通志新會志參修

坳頭井在坳頭村後山半深三丈許水半之口尺半其下漸參俗云通厓門恐未然采訪冊

溫涼井在獨洲林姓村內人戶數百胥汲之泉常溢或云冬可浣浴故名

靈丹井在沙岡祥雲里醫靈廟東凡病者祈神得水飲之多應味清甘源最盛宵罕人汲之汲則決溢於外

九源井一名九龍井在九源寺旁

谷泉井在城東七里虎頭廟前

阿公井在良溪村後沖坑山味與他泉異

察院井在北門長塘俱同上

三水縣

龍鳳澗在城內其上原為巖自得鄉址其水環合旋繞學宮

左有井亦曰龍鳳井據郭通志張府志阮通志三水志參修

河清灘在邑治上流西三里許有石磯急灘冬出比目魚甚

美張府志

蒼江在邑治上流西通西北兩江之流老鴉洲龍船沙俱在

其西蓋沙洲皆界西二流中也阮通志

西江從鬱梧來流至縣西五里許遶橫石而南出大路峽過

金洲通江門入海其上流分支而西者為清遠峽水達於四會對橫石嶺前東折者由蒼江遠邑治前與湏水會於肄水惟西江分遠縣治者夏月四之一餘月十之一耳

北江自清遠峽口北來過鴨浦水至胥江下分東支為蘆包水其經流南下歷欖江棉水至河清灘遠邑治前會西來鬱水是為肄江俱同上

肄江即古白埕江會西北流者蒼江遠崑都山通西北之水從此下流至西南分二支其經西南潭者則東行抵三江靈洲下石門之衝其經老沙洲外者則東行抵黃鼎小塘荔枝園而出於莊步兩江皆達省會舊多取道石門今則專行莊步經小塘之流又分一支通西樵據阮通志張府志三水志參修鹿崗水在城東六里水自尚出遠魁岡達於大江

大潮水在縣東源出縣東北大潮竇西南流至魯村竇入西江大清一統志

西南潭黃通志張府志三在城東十八里商船多泊於此東廣

輿圖

蘆包水北江分流而東者四蘆包水在城北四十里遠而東至三江鹹魚嘴會肄水之流達於靈洲官窰其水順流入胥江內分一河春溢冬涸據郝通志張府志參修

陶水在縣南出堯山下西北注於滙水又翁水出縣東北利山湖亦西南注於滙水三水合流縣因以名方輿紀要

鴨浦水在城北四十六里東流合於北江水自萬山中出夏冷冬溫鴨鶩樂聚故名據廣東輿圖方輿紀要阮通志參修

丹泉張府志三水志作雲谷泉在城南四十里一名葛仙井其水甘冽秋

冬不竭郭通志

四會水發源西江至青岐分支流達於四會至縣治合流入

江張府志

綏江源自懷集過廣甯至四會一支分流大沙為浦水西與
牂牁江合一支至南津口東下與湏武湟三水會流至肄江
經崑都山由大江東下一由思賢澹西出舊志未載今查補

入三水志

交溪水縣南之別流同上

樂塘江近何木岡明永樂高安潛溟為廣東副使朝覲經此
洗硯失入水中次年還舟泊江側見硯隱隱在沙拾之作詩

以記郝通志

清遠縣

真水在清遠東七十里流經縣前至上梅村四會縣分界漢

樓船將軍楊僕出豫章下真水是也湏水源出大庾嶺流經

韶州府英德縣又南過廢中宿縣湏水宋時謂之貞水流經

觀峽又西南流八十里有黃巢磯據輿地紀勝方輿紀要

湏水在縣東自英德縣合湏湏二水流入縣界又西南入三

水縣合北江大清一統志

湏水又西南逕中宿縣會一里水又南逕中宿縣南又南注

於鬱湏湏湏雖本三水然至英德縣已皆合流故三名皆可

通稱其實卽一水也據水經注大清一統志參修

秦水其源出本縣秦山下南流四十里入官湖合湏江輿地紀勝

謹案清遠志云秦水源出秦山又由秦山下南流四

十里方合湏江是湏水湏水合之後尙有獨流四十

里之秦水秦水出秦山不與溱水同源張府志謂源出溱源山誤矣

藜塘水在縣東三十里水旁多產藜樹清遠志

米貴水在金釵灣上中有二水米貴水流朱溪岸米賤水流

綠林塘故名張府志

月溪水其源出牛嶺合溱江在縣東與仁鄉月夕則清水湛

然湫澱浮碧張府志輿地紀勝清遠志參修

瀾水在縣東源出小帽山張府志

金鎖潭張府志清遠志作犀牛潭在縣東三十里秦時崑崙貢犀牛帶金

鎖走入潭中晉時有漁人周重案者釣得金鎖牽之見犀牛

擊之不得斷得金鎖一尺寰宇記

湯泉在縣東五十里其石如鑊方圓一丈從冷水溪中突起

高七尺餘兩面冷水流其中四時氣蒸如雲霧可煮食物患

瘡者浴之立效湯泉有二一在縣東溱江湯塘村一在縣西

善化鄉據寰宇記清遠志參修

謹案阮通志云輿地紀勝有湯泉其說與寰宇記同

今本寰宇記誤作陽水

溱江水在縣東南五十里溱江鄉源出觀音山西流至溱江

口入溱溱江水由上石角過湯塘墟至關前船多灣泊經黃

口汎有米貴水來會至江口墟有源潭水會直出峽口入溱

據張府志大清一統志阮通志參修

連水在縣東南四十里源出王子嶺流入溱大清一統志

龍潭在縣東南常有龍起清遠志

觀音井一名定心泉在峽山寺西其泉清淺而味甘常溢不

謁相傳昔跋多羅三藏居此寺乾涸無泉一日忽見老人問曰何求孳孳於此三藏曰為無泉可汲耳老人指石云但定其心何慮無泉三藏遂於巖前朝夕誦經命工鑿石而泉湧出因名定心泉

放生池即峽山前峽水是也上至白泡潭下至犀牛潭唐天寶閒京師劉楚舟泊寺岸見五色雲從峽山起夜夢數人各青衣揖謂曰願易此海為安樂窩也晨興與知者議曰莫非水族必此界之神龍也表聞於此遂奉敕禁絕漁捕賜峽為祝聖放生池俱同上

白泡潭在峽山上流六七里每遇水長白泡浮游張府志

凝碧灣在峽山寺前阮通志

灑江一鄉石門洞內有金坑同上

石頭潭水在城西二十里張府志

飛水在縣西三十五里源出大岐峽南流入湏據大清一統志阮通志

參修

廉水在縣西四十里高平鄉源出重山趾水側有人姓廉居此故名一名山塘水西流入湏據輿地紀勝大清一統志參修

政濱江張府志作濱江水在縣西北六十里源出大羅山流經臨漢

峽又南入湏水南海郡舊有政賓縣以政賓得名唐武德五年入清遠府志作濱江水沿俗名耳一云其水會合浸潭沙

河羅塘鑼鼓灘白石潭羅山池水諸水經峽南入湏船多來往在池水鄉據張府志大清一統志阮通志清遠志參修

白石潭在濱江源出上崗大巖尾為陽山清遠交界清遠志

羅山坑源出大羅山入政賓江

池水在濱江司署後源出壩頭墟山上流至司署前與政賓

江合

鑼鼓灘在濱江東岸

羅塘在鑼鼓灘上

沙河在政賓江羅塘水口上

浸潭在沙河上四十里

淘金坑在濱江沙河上河旁橫出小溪產碎金俱同上

燕水張府志作大燕水源出番禺黃山北流九十里合真江在縣南

五十里迴岐山對面閩人作梁漁利甚廣方輿紀要云迴岐

山下有岐水當卽此水也據輿地紀勝大清一統志張府志阮通志清遠志參修

黃崗水在縣北清遠志作東北七十里源出小羅山大清一統志

沙河水在縣北後岡村西流與飛水合同上

花縣

蘇崗水在城東十里從山後流出至龍口與正逕水合花縣志

正逕水在城西五里西與牛牯屯水與蘇崗水合

牛牯屯水發源屋簷水在城西五里南流與橫潭水合俱同上

橫潭水在縣西南三十五里源出縣南正逕諸溪西南流獅

嶺司南入巴由水大清一統志

巴由水在縣西南五十里自三水縣蘆包水口入至巴由都

與橫潭水合又南至石門入西江大清一統志

馬逕水在城西六十五里上接蘆包水下經官窰出鹹魚嘴

與巴由水合花縣志

巴水上通清遠下達石門其水屈曲如巴字故名採訪冊

順德周寅清分纂	番禺金佑基初校	番禺史悠乾再校
	番禺史悠履三校	番禺金偉基四校

廣州府志卷十四終



